

Paonori Corintoquë ya'huëpisopita ninshitërinso'

**Imapisopita yonquiaton,
quirica a'patërinso'**

1 ¹Ca Paonoco ninshitaranquëma'.
¿Noya canpitanta' ya'huarama'?
Canta' isëquë noya ya'huarahüë. Yosë
nohuanton, Quisocristo acorinco
nanamën a'china'huaso marë'. Iya
Sostinisëro'co nanan a'patarain-
quëma'. ²Corintoquë ya'huëramasopita
ninshitaranquëma'. Canpitanta' Yosë
huëntonënnquë ya'conama'. Quisocristo
impatama', anoyacancantërinquëma'
ni'ton, noyápiachin cancantërama'.
Yosë acorinquëma' piyapinënpita nica-
camaso marë'. Nisha nisha parti a'na-
pitanta' Quisocristo imapi. Ya'ipinpoa'
ina hua'anëntërinpoa'. A'na huënton
pochin ninëhua'. ³Inaora nohuanton,
Tata Yosë catahuainquëma'. Asanocan-
cainquëma'. Siniro Quisocristonta'
inachachin catahuainquëma'.

Yosë catahuarinpoaso'

⁴Quisocristo imapatama', Yosë noso-
roatënnquëma', catahuarinquëma'. Ina
marë', "Yosparinquën," itërahüë Yosë.
⁵Quisocristo imarama' ni'ton, na'con
catahuamiatërinquëma'. Ina catahua-
huachinquëma', noya yonquiatoma'
noya nia'chintarama'. Yonquirinso
chachin anitotërinquëma'. ⁶Quisocristo
nanamën a'chintohuatënnquëma', Yosë
catahuarinquëma' natëcamaso marë'.
"No'tëquën sha'huitërinpoa'," ta'toma',

natërama'. ⁷Canpitaora co nanitëra-
mahuë' Yosë pochin cancantacamaso'.
Nipirinhüë', Yosë ananitarinquëma'. Co
manta' pahuantarinquëmahuë' noya
nicacamaso marë'. Catahuarinquëma'
ni'ton, noya cancantatoma', Siniro
Quisocristo o'mantacaso' tahuëri
ninarama'. ⁸O'mantaquë huarë' inaso'
achinicananarinquëma'. Oshanëma'
inquitatënnquëma', noyápiachin cancan
quëtërinquëma'. Imamiatarama' ni'ton,
o'mantahuachin, co insonta' ana'in-
tarinquëmahuë'. ⁹Yosë co nanianta-
rinquëmahuë'. Sha'huitërinquëmaso
chachin catahuarinquëma'. Nani
acorinquëma' hui'nin nohuitacamaso
marë'. Quisocristo chachin hua'anën-
tërinpoa huachi.

Nisha nisha imapiso'

¹⁰Apira iyaro'sa' Siniro Quisocristo
nanan quëtërinco ni'ton, pënënanan-
quëma'. Ina imarama' ni'quëhuarë',
noya ninontoco'. Ama nisha nisha
yonquiatoma', a'na' a'na' imacosohüë'.
Napopináchin yonquiatoma', noya
nini'toma' ya'huëco'. ¹¹A'naquëma',
iyaro'sa', canpita capini nino'huirama',
natantërahüë. Croi quëmopinënpita
sha'huitiirinco. ¹²Nisha nisha nonama':
"Paono imarai," tënama' a'naquëma'.
"Quiyaso' Aporosë imarai," tënama'
a'naquëma'. A'naquëmanta': "Pitro
imarai," tënama'. A'naquëmaso nipirin-
hüë': "Cristo imarai quiyaso'," tënama'.

¹³A'naíchin Cristo ya'huërin imacaso'. ¿Onpoatomata' nipachin nisha nisha imarama'? ¿Caso' co canpita oshanëma marë' corosëquë patanantërinacohuë! Aporintohuachinënquëmara, ¿ma'ta' tënama'? “Paono imarahuë,” co tënamahuë pora. ¹⁴Co na'acquëma' aporintëranquëmahuë'. Crispo, Acayo, inaíchinquëma' aporintëranquëma'. Ina marë' noya cancantërahuë. ¹⁵Na'acquëma' aporintëranquëma' naporini, “Paono aporintërincoi ina imaca'huaiso marë',” ichitomacohuë'. Co napotamacoso' nohuantërahuë'. ¹⁶I'yan, Istipanasënta', sa'in, hui'ninpita, inapitarë chachin aporintërahuë. Inaíchin aporintërahuëso', topirahuë'. Co huachi a'na yonquirahuë'. ¹⁷Nanamën a'china'huaso marë' Quisocristo acorinco. Co aporinta'huaso marë' acorincohuë'. A'chintohuatënquëmara, co na'con nitotoro'sa pochin nontëranquëmahuë'. Quisocristo corosëquë chiminin oshanënpoa' inquitinpoaso marë', tënahuë. Inaíchin nanitaparín nicha'ëinpoaso'. Napoaton inasáchin a'chinahuë. Nisha nisha a'chinahuë naporini, Quisocristo niananchitomahuë'. Inaíchin yonquihuatëhua', tëhuëinchachin anoyacancantërinpoa'.

**Quisocristo chiníquën
nanantaton, nicha'ërinpoaso'**

¹⁸A'chinpatëra, “Quisocristo corosëquë chiminin nicha'ëinpoaso marë',” itërahuë. A'naquën natanpachinara, tëhuapi. Naporinsopita chiminpachina', parisotomiatapi. Canpoaso nipirínhuë' noya natanëhua'. Nani Yosë anoyacancantërinpoa'. Yosëfchin nanitaparín nicha'ëinpoaso'. ¹⁹Quiricanën quëran itapon:

“A'naquënso' nani ma'sha
nitotaponaraihuë', co noya

yonquipihuë'. Inahuara
cha'ëcaiso' yonquipirínahuë',
co nanitapihuë'.

Nani ma'sha yonquiaponaraihuë',
napoonin yonquipi,”
tënin Yosë.

²⁰A'naquën inahuara yonquinëna quëran nani ma'sha nitotopi. A'naquënta' nitoa'chinapi. A'naquëonta' míso nonpi. Inapopirínahuë', ¿ma'ta' ina marë' canapi? Co manta' canapihuë'. “Co nanamëhuë imatomahuë', napoonin yonquirama',” itërin Yosëri. ²¹Ina nohuanton, piyapi inahuara yonquinëna quëran co nanitopihuë' Yosë nohuitacaiso'. Quisocristo chiminso' a'chinárai. A'naquënso' ina natanpachinara, tëhuapi. Canpoaso nipirínhuë' natëhuatëhua', anoyacancantërinpoa'. Ina Yosë nohuantërin.

²²Cotioro'saso' co yanatëtopihuë'. “Yosë pochin niquë'. Ina ni'patoí, natëarainquën,” toconpi. Nisha piyapi'santa' co yanatëtopihuë'. Na'con na'con nitotacasaráchin yonquipi. “Quiyaora yonquinëhuëi quëran nitotarai,” topi. ²³Quiyaso nipirínhuë' Quisocristo nanamënáchin a'chinai: “Corosëquë canpoa marë' chiminin,” tënai. Cotioro'saso' co natëtopihuë': “Inaso' Yosë hui'nin naporini, co chimiintonhuë',” toconpi. Nisha piyapiro'sarinta' co nohuantatonaraihuë', tëhuapi. ²⁴Canpoaso nipirínhuë' Yosë huayoninpoa' ni'ton, Quisocristo imarëhua'. Inaso' no'tëquën yonquirin. Ya'ipiya nitotaton, no'tëquën anitotërinpoa'. Inasáchin nanitaparín anoyacancantërinpoaso', tënëhua'. Quiyanta' cotio piyapicoi nipiraihuë', canpitanta' nisha piyapinquëma' nipomarahuë', Yosë nohuanton, imarëhua'. ²⁵A'naquën Quisocristo nanamën tëhuapi. “Quiyaso' na'con na'con nitotërai,” topirínahuë', Yosëso' noya noya yonquiaton, no'tëquën

anatotërinpoa'. A'naquëonta' "Co inaso' chiniquën nanantërinhuë'," ta'tona', co natëtopirinahuë'. Yosëso' ya'ipi nanitapaton, anoyacancantërinpoa'. ²⁶Ni'co' iyaro'sa'. Na'aquëma' co na'con nitotopiramahuë', Yosë huayoninquëma'. Co chiniquën nanantona'piro'sa pochin nipiramahuë', nohuantërinquëma'. Carañchin ma'huano'saso' imasapi. ²⁷Yosë nohuanton, na'a topinan piyapi'sa' imasapi. A'naquënso nipirinhuë' na'con nitotaponaraihuë' co imapihuë'. Chiniquën nanantopirinahuë', co Yosëri nicha'ërinhuë'. Inapita atapanacaso marë' Yosë nohuanton, na'a topinan piyapi'sa' imasapi. ²⁸Iporaso' a'naquën nocaninënpoa'. "Canpitaso' topinan piyapi'sanquëma'. Co manta' nitotëramahuë'. Napoonama'," itopirinënpoahuë', Yosëso' nohuantërinpoa'. Inapitaso' chiniquën nanantaponaraihuë', co imapihuë' ni'ton, ya'ipi Yosëri ayatarin. ²⁹Co insonta' inaora cha'ëponhuë'. Yosë'pa' huanihuatëhua', co inquënpoa tëranta' nanitarihuahuë': "Caso' noyaco," ta'caso'. ³⁰Yosë nohuanton, Quisocristo imarëhua'. Imapatëhua', ya'coancantërinpoa' ni'ton, yonquínahuan pochin Yosë ni'ninpoa'. Naporahuaton, catahuarinpoa' no'tëquën yonquicaso'. Oshanënpoa' inquitohuachinpoa', noya huachi ni'ninpoa'. Nasha cancan quëtërinpoa' noya nicacaso marë'. Quisocristo chachin nicha'ërinpoa'. ³¹"Ma noyacha Yosëso' ni'ton, anoyacancantërinpoa' paya,' nitahua'. 'Quiyaso' noya noyaco,' ama tocosohuë'," tënin Yosë quiricanënguë'.

Quisocristo nanamën sha'huirinsó'

2 ¹Canpitataquë pa'patëra, Yosë nanamën a'chintëranquëma'. Co iyaro'sa' míso nona'pi pochin nontëranquëmahuë'. Co na'con na'con nitotërinso

pochin a'chintëranquëmahuë'. ²Co'huara pa'shatërapohuë', yonquirahuë. "Quisocristo naporinsoáchin a'chinarahuë. Corosëquë oshanënpoa marë' chiminso' a'chinchin," ta'to, inaíchin sha'huitëranquëma'. Inasáchin imacamaso marë'. ³Canpitataquë ya'huasoco, co chiniquën cancantërahuë'. "Co caora nanitërahuë' noya a'china'huaso'," ta'to, naporahuë'. ⁴Co na'con nitotona'pi pochin nontëranquëmahuë'. Ispirito Santo chachin catahuarinco nanamën nóya a'china'huaso marë'. Inaso' ya'ipi nanitaparin. Natanpatama', "Yosë nanamën chachin a'chintërinpoa'," ta'toma', natërama'. ⁵Napoaton co piyapi yonquirinso' imaramahuë'. "Yosëíchin ya'ipi nanitaparin," ta'toma', natërama'.

Yosë anitotërinpoaso'

⁶Napoaponahuë', chinoton pochin cancantopisopita a'chintohuatoí, ya'ipi Yosë yonquirinpoaso' a'chintërai. Co piyapi'sa' yonquipiso' a'chinaihuë'. Co hua'ano'sa' yonquipiso tëranta a'chinaihuë'. Inapitaso' inahuara yonquipisoáchin yonquiatona', co Yosë pochin yonquihuë' ni'ton, ta'huantapi. ⁷Co inapita pochin a'chinaihuë'. Yosë yonquirinso chachin a'chinai. Iráca co'huara isoro'pa' ya'huëyátërasohuë', Yosë ninotonpoa', yonquirinpoa' anoyacancantoinpoaso marë'. Anoyacancantohuachinpoa', inarë'quënpoa' ya'huëmiatarihua'. Iráca co insonta' nitotopirinahuë', iporaso huachi Yosë anitotërinpoa' ni'ton, a'chintërainquëma'. ⁸Hua'ano'saso' co nitotopihuë'. Nitotopi naporini, co Quisocristo tëpa'itonahuë'. Inaso' Yosë chachin. Noya noya nipirinhuë', tëpapi. ⁹Napoaponahuë', Yosë quiricanënguë' naporin:

"Yosë nosorohuatëhua', noya noya catahuarinpoa'. Noya

nininsopita nani tapatë-
rinpoa'.

Co inso tēranta' ina pochin
ni'chininhuè'. Co incari
tēranta' nataninhuè'.

Yosè noya yonquirinpoaso', co
insonta' inaora nitotërin-
huè',” tēnin quiricanēnquē.

¹⁰Imarēhuasopitaso nipirinhue', nitotë-
rēhua'. Yosè nohuanton, Ispirito Santo
anitotërinpoa'. Ya'ipi Yosè yonquirin-
sopita Ispirito Santo nitotërin.

¹¹Co insonta' piyapi yonquirinso'
nitotërinhuè'. Ispiritonēn tēhuēn-
chinso nitotërin. Inapochachin
Ispirito Santonta', Yosè ispiritonēn
ni'ton, yonquirinso chachin nitotërin.

¹²Imarēhuasopitaso' co piyapi yonqui-
piso' imarēhuahuè'. Yosè nohuanton,
Ispirito Santo ya'coancantërinpoa'.
A'chintinpoaso marè' a'patimarinpoa'.
Ya'coancantohuachinpoara, Yosè yonqui-
rinpoaso' anitotërinpoa'. ¹³Quiyanta'
ina nitotatoi, a'napita a'chintarai. Co
quiyaora yonquinēhuēi quēran a'chi-
nainhuè'. Ispirito Santo ayonquirincoi
noya a'china'huaiso marè'. Chinoton
pochin cancantopisopita a'chintohua-
toira, ma'sona tapon naporinsopita
a'chintarai.

¹⁴A'naquēnsō nipirinhue' piyapi
yonquirinsoráchin nitotatona', co
nohuantopihuè' Yosè nanamēn nata-
nacaiso' ni'ton, tēhuaconpi. Ispirito
Santoráchin catahuarinpoa' natēta-
caso'. Napoaton co imarinsopitasohuè'
natanaponaraihuè', co nanitopihuè'
no'tēquēn yonquicaiso'. ¹⁵Ispirito
Santo catahuahuachinpoa', no'tēquēn
yonquiarihua'. A'napitaso' co canpoa
pochin yonquipihuè'. Co nitotatona-
raihuè': “¿Onpoatomata' ina pochin
yonquirama'?” itërinēnpoa'. ¹⁶Quiri-
canēnquē naporin: “¿Co insonta' Yosè

yonquirinso' nitotërinhuè'! ¿Co incari
tēranta' nanitërinhuè' ina a'chinta-
caso'!” tēnin. Canpoaso nipirinhue'
Quisocriso imapatēhua', yonquirinso
chachin ayonquiarihuachi.

Inpriatoro'sa pochin nipiso'

3 ¹Ya'ipi Yosè nanamēn iyaro'sa'
yaa'chintopiranquēmahuè', co
ipora nanitërahuè'. Ispirito Santo
cancanēma quēran huarè' natërama'
naporini, na'con a'chinchitēnquēma-
huè'. Co noyahuè' yonquiramasopita
co nanianchátëramahuè'. Quisocriso
imapiramahuè', hua'huishin pochin
cancantërama'. ²Ni'co'. Hua'huishin
sho'shoíchin nanpitërin. Co cosha-
chatërarinhue'. Inapochachin canpi-
taso' ninama'. Ya'nan a'chintapon-
quēma', pi'pian a'chintëranquēma'.
Aquetè' yaa'chintopiranquēmahuè', co
nanichátëramahuè' no'tēquēn yonqui-
camaso'. Iporahuanta' co nanitërama-
huè'. ³Co noyahuè' yonquiramasopita
co nanianchátëramahuè'. Canpita
capini ninoyapatoma', nino'huirama'.
¿Onpoatonta' canpitaora nohuantë-
ramasoachin yonquiconama'? Nisha
nisha yonquiatoma', co imapisopi-
tahuè' pochin cancantërama'. ⁴“Paono
imarai quiyaso',” tēnama' a'naquēma'.
“Quiyaso' Aporosē imarai,” tēnama'
a'naquēmanta'. Ina pochin nonatoma',
co imapisopitahuè' pochin yonquirama'.

⁵Co ca imamacoso' ya'huërinhuè'.
Aporosēnta' co imacaiso' ya'huërin-
huè'. Quiyanta' topinan piyapicoi
nipiraihuè', Yosè sha'huitërincoi ni'ton,
a'chintërainquēma'. Natanpatama',
Yosè imasarama'. ⁶Ni'co'. Iminpatëra,
a'naso' sha'tërin. Ina quēran a'nanta'
pacarapiton, i'shaquē oporapitërin
noya papotacaso marè'. Nipirinhue',
Yosëríchin apapotërin. Inapochachin

carinquëma'ton a'chintëranquëma'. Ina quëran Aporosënta' a'chintantarinquëma'. A'chintopirainquëmahuë', Yosëso' anoyacancantërinquëma'.⁷ Napoaton co ca imamacoso' ya'huërinhuë'. Aporosënta' co imacaiso' ya'huërinhuë'. Yosë anoyacancantërinquëma' ni'ton, inasáchin yonquicamaso' ya'huërin. ⁸Sha'tërëso pochin carinquëma'ton a'chintëranquëma'. A'nari i'shaquë oporapitërinso pochin Aporosënta' a'chintantarinquëma'. Catocoi chachin Yosë inpriatonën pochin ninai. Inprietoro'sa' sacatohuachinara, hua'anëni pahuërerin. Onpopinsona sacatohuachinara, no'tëquën pahuërerin. Inapochachin quiyaso' Yosë marë' sacatarai ni'ton, ina acanarincoi. ⁹Quiyaso' Yosë a'parincoi ina marë' sacata'huaiso'. Canpitaso nipirinhuë' Yosë sha'tërinso pochin ninama'. Naporahuaton, Quisocristo imarama' ni'ton, Yosë pëinën pochin ninama'.

¹⁰Natëricho quëran yapëihuatëra, acopo' ihuatahuatë', siminto acorë'. Ina'ton acorëso pochin carinquëma'ton a'chintëranquëma'. Yosë catahuarincó no'tëquën a'china'huaso'. Ina quëran a'napitanta' a'chintantarinquëma'. Napoaponahuë', a'naya a'naya noya yonquiaton pëirinso pochin a'napita noya a'chintacaso' ya'huërin. ¹¹Quisocristoso' ina siminto pochin ninin. Yosë nohuanton, ya'huërin. Co a'na ya'huërinhuë'. Co ina imapatëhuahuë', co onporonta' Yosë nohuitarihuahuë'. ¹²Siminto nani acohuachina, nisha nisha quëran pëipi. A'naquën oro, prata, inapita quëran pëipi. Nisha nisha na'piro'sa' pa'ton nininsopita quëran pëipi. A'naquënso nipirinhuë' nara, panpë, piquira, inapita quëran pëipi. ¹³Tachiton nininso quëran pëipatëra, noya ninin, co huiquitërinhuë'.

Nipirinhuë', nara, panpë, piquira inapita quëran pëipatëra, a'naroáchin huiquitërin. Inapochachin ayaro' tahuëri Yosë ya'ipinpoa' ninëhuasopita pën quëran tëniarin. Naporó' ya'ipi piyapi'sa' nitotapi. ¹⁴Noya nipatëhua', tachiton quëran pëirinso pochin nisarëhua'. Inaso' co huiquitërinhuë' ni'ton, Yosë noya ni'sarinpooa'. A'napita catahuarëhua' noya imacaiso marë'. Napoaton inápaquë acanaarinpoa'. ¹⁵A'naquënso nipirinhuë' Yosë imaponaraihuë', co ya'ipi cancanëna quëran imapihuë'. Co a'napita catahuapihuë' noya imacaiso marë'. Napoaton pëi' huiquitërinso pochin nisapi. Yosë'pa' paponaraihuë', co ina marë' sacatopihuë' ni'ton, inápaquë co manta' canaapihuë'.

¹⁶Yosë imapatëhua', ina pëinën pochin ninëhua'. Ispirito Santo ya'coancantohuachinpoa', cancanënpoaquë ya'huërarin. ¿Co ina nitotëramahuë' ti? ¹⁷Canpitaso' Yosë pëinën pochin ninama' ni'ton, a'na piyapi atapicanpachinquëma', Yosëri chiniquën ana'intarin. Yosë pëinënuëso' noyasáchin nicacaso' ya'huërin.

¹⁸Ama inquëma tëranta' isoro'paráchin yonquiatoma', ninonpintocoso' huë'. “Caora noya noya nitotërahuë,” co ta'caso' ya'huërinhuë'. Ama ina pochin yonquicosohuë'. “Caora co no'tëquën yonquirahuë'. Catahuaco Sinioro noya yonqui'i,” topatama', Yosë catahuarinquëma' noya noya yonquicaso'. ¹⁹Co imapisopitahuë' nani ma'sha nitotaponaraihuë': “Co no'tëquën yonquipihuë’,” tënin Yosë. Quiricanën quëran anitotërinpoa'. “Na'con nitotatona', piyapi'sa' nonpintopirinahuë', co nanitopihuë' Yosëso' nonpintacaiso'. Inari na'con na'con nitotaton, minsëarin,” tënin. ²⁰Yosëso' ya'ipi nitotërin. “Piyapi'sa'

na'con yonquipirinahuë', napoonin yonquipi," ténin anta'. Quiricanën quëran naporin. ²¹Napoaton ama piyapi'sa' pa'yatocosohué'. "Paso' quëmapi noya noya a'chintërincoi," ama tocosohué'. Yoséichin pa'yatacaso' ya'huërin. Inari ya'ipi acorin canpita marë'. ²²Ina nohuanton, carinquëma' a'chintëranquëma'. Aporosë, Pitro, inapitanta' Yosëri a'parin a'chintinquëmaso marë'. Nani ma'sha isoro'paquë quëtërinpoa' noya ya'huëcaso marë'. Anoyacancantërinpoa' Yosë nohuitatëhua' noya noya nanpicaso marë'. Chiminpatëhua', ya'huërin'pa' noya noya ya'huëcontarihua'. Ipora tahuëri'sa' noya catahuarinpoa'. O'mantacaso' tahuërinta' co naniantarinpoahuë'. Noyasáchin yonquirinpoa'. ²³Quisocriso anoyacancantërinpoa' ni'ton, inasáchin imacaso' ya'huërin. Inaso' hua'anëntërinpoa'. Tata Yosëri chachin a'paimarin.

Yosë marë' sacatëraiso'

4 ¹Hua'qui' piyapi'sa' co Yosë nanamën nitotopihuë' ni'ton, Yosë a'parincoi nanamën a'china'huaiso marë'. Quisocriso inpriatonën pochin ninai. Ina yonquico'. ²Inpriatonpo' nipa'tëra, hua'anënpa' no'tëquën natëcaso' ya'huërin. Inapochachin Yosë hua'anëntërincoi ni'ton, inasáchin natëcaso' ya'huërin. ³Napoaton sha'huirapihuatamaco, co ina yonquirahuë'. Piyapi yonquirincoso' co yonquirahuë'. Co caora tëranta' nisha'huirapica'huaso' yonquirahuë'. ⁴Noya mini natërahuë, topirahuë', co caso' Yosë pochin nitotërahuë'. "Noyaco," tënahüeso marë' co Yosë noya ni'sarincohuë'. Inaíchin ya'ipi nitotaton, no'tëquën sha'huitarinpoa'. ⁵Napoaton iporaso' ama nisha'huirapiahuasohué'. A'na

tahuëri Siniro o'mantahuachin, ya'ipi piyapinpoa' téniarinpoa'. Ya'ipi ninëhuasopita anitotarinpoa'. Po'oana quëran ninëhuasopitanta' a'ninquëchin sha'huitarinpoa'. Yonquirëhuasopitanta' nitotërin. Ma'marësona tëranta' naporëhuaso' anitotarinpoa'. Naporo' ya'ipinpoa' no'tëquën nontarinpoa'. Noya nipatëhua', noya ni'sarinpoa'.

⁶A'chintohuatëinquëmara iyaro'sa', Yoséichin yonquirai. Aporosëre'coi a'chintërainquëmaso' ninshitëranquëma' canpitanta' quiya pochin yonquicamaso marë'. Yosë quiricanënáchin natëcaso' ya'huërin. A'na quëmapi noya noya a'chintohuachinquëma', ama inasáchin pa'yatocosohué'. ⁷Yosë nohuanton, nisha nisha nitotërehua'. Co canpoara nohuanton, nitotërehuahuë'. Yoséichin catahuarinpoa' noya noya nicacaso'. Co catahuarinpoahuë' naporini, co manta' nitochitërihuahuë'. Napoaton co nocantacaso' ya'huërinhuë'.

⁸Canpitaso' naporama': "Nani ya'ipi nitotërai. Co manta' pahuantërincoihuë' noya cancanta'huaiso marë'. Quiyaora noya nitotatoi, hua'an pochin chiníquën nanantërai," topiramahuë'. ¡Tëhuëenchachin chiníquën nanantërama' naporini, quiyanta' isoro'paquë chachin chiníquën nananchitoihuë'! ⁹Co ina tahuëri naniyatërarinhuë'. Yosë nohuanton, co piyapi'sa' noya ni'ninacoihuë'. Nanamën a'china'huaiso marë' a'papirincoihuë', na'a piyapi'sa' co nohuantopihuë'. Apiro'sa pochin ni'ninacoi. Chimirin quihuitërinacoi. A'ninquëchin aparisitërinacoi ni'ton, anquëniro'santa' nicataona', pa'yanpi. ¹⁰Quisocriso natëtoi, nanamën a'chinaraí. Ina marë' quiyaso' tëhuarinacoi. Canpitaso nipirinhuë' noya nitotona'piro'sa pochin nicatënnëquëma', co tëhuarinënnëquëmahué'. Quiyaso' co

chiníquën nanantëraihuë'. Canpitaso nipirinhüë' chiníquën nanantërama'. Piyapi'sa' noya ni'pirinënquëmahuë', quiyaso' co noyahuë' ni'ninacoi. ¹¹Iporahuanta' parisitarai. A'na tahuëri tana natanai. Yamororai. A'moca'huai-sonta' pahuantërincoi. Ahuërinacoi. Pa'sápatoi, co huachi ya'huëmiatë-raihuë'. ¹²Chiníquën sacatatoi, canotërai. No'huipirinacoihuënta', noya nontërai. Aparisitoahuachinacoiranta', co no'huiraihuë'. Ahuantërai. ¹³Pinopachinacoiranta', sanoanan quëran nontërai. "Nanan anoyachi," ta'toi, noya nontërai. No'huitonacoi, iporahuanta' co quë'yarinacoihuë'. Amoro pochin ni'ninacoi.

¹⁴Co no'huiranquëmahuë'. Nosororranquëma'. Co nohuantërahuë' atapana'huanquëmaso'. Pënëna'huanquëmaso marë' ninshitaranquëma'. Hui'nahuëpita pochin nicatënquëma', napotaranquëma' noya yonquicamaso marë'. ¹⁵Notohuaro' piyapi'sa' Quisocriso nanamën a'chintopirinënquëmahuë', carima'ton pënënanquëma' ni'ton, imarama'. Quisocriso nanamën sha'huitohuatënquëmara, natërama'. Napoaton tataparima pochin ni'co. ¹⁶Ina pochin cancantatomaco, nonanco, ténahuë.

¹⁷Ina marë' Timotio a'patëranquëma'. Inaso' noya ni'nahuë. A'chintohuatëra, Quisocriso imarin ni'ton, hui'nahuë pochin ni'nahuë. Nóya Siniro imarin. Ya'ipi naporahuëso' ayonquiarinquëma' noya noya imacamaso marë'. Insëquësona pa'patëra, Quisocriso nanamënsáchin a'chinahuë. Imapisopita niyontonpachinara, a'chintërahuë. ¹⁸A'naquëmaso nipirinhüë' noca-natomaco, "Quiyaso' Paono quëran na'con na'con nitotërai. Napoaton co huachi yahuë'ninhüë'," topiramahuë'.

¹⁹Tëhuënychachin nicaponquëma' yapa'sarahuë. Yosë nohuanton, co hua'quiya quëranhuë' pa'sarahuë. Naporo' nocaninacosopita ni'sarahuë. Na'con nonpirinahuë', co nimara nanitapapihuë' Yosë marë' noya sacatacaiso'. ²⁰Co topinan quëran nonacaso' ya'huërinhuë'. Yosë hua'anëntohuachinpoa', piyapi'sa' catahuarëhua' noya noya imacaiso'. ²¹Nosororranquëma' ni'ton, sanoanan quëran yapënpirranquëmahuë'. Co Yosë natëhuatamahuë', pa'pato ana'inta'huanquëmaso' ya'huërin. Canconpato, ¿ma'cha onpochinquëma nicaya? ténahuë.

Quisocriso imaponahuë', oshahuaninso'

5 ¹A'naquënsó' co noyahuë' nicaton, monshihuanin, topi natantërahuë. Inaso' pa'pin sa'in monshitërin. Inapoaton, pa'pi co noyahuë' ninin. Co imapisopitahuë tëranta' co onporonta' ina pochin nipihuë'. ²Canpitanta' nitotapomarahuë', co ina marë' tapanamahuë'. Ina oshanën yonquiatoma' sëtacamaso nipirinhüë', iporahuanta' "Quiyaso' nóya imarai," toconama'. Nani ocoicaso nipirinhüë', co ocoirama'huë'. ³Co canpitataquë ya'huaporahuë', canpitataquë ya'huë'arahuëso pochin cancantato, yonquiranquëma'. Ina quëmapi no'tëquën ana'intacaso' ya'huërin, ténahuë. ⁴⁻⁵Quisocriso imarama' ni'ton, niyontonco'. Niyontonpatama', ca pochin cancantatoma', ina quëmapi chiníquën pënëncó'. "Siniro Quisoso nanan quëtërincoi ni'ton, ama huachi Tata Yosë a'painquënsóhuë', ténai. Sopai natëran ni'ton, parisitamaso' ya'huërin," itoco'. Inapotohuatama', a'na tahuëri yonquiapon nimara. "Co noyahuë' yonquirahuëso' naniantato, Yosë imanta'i," tapon

nimara. Napohuachin, Siniro Quisoso o'mantahuachin, nicha'ësarin huachi.

“Iporaso nipirinhue’ “Nóya imarai,” topiramahué’, co ya'ipinquéma' noya ninamahué’. Co no'téquén yonquiramahué’. Ni'co’. “Pan nipatëra, pi'pian ahuëpocatërinso' acohuachina, ya'ipi së'cotërin,” topi. Nani ina nitotërama'. Inapochachin a'nayanquëma tëranta' co noyahué' yonquihuataama', ya'ipinquéma' nitapicancanarama'.⁷ Iráca Pascoa cosharo' ca'pachinara, co pi'pian tëranta' ahuëpocatërinso' nohuantopihué’. Ya'ipiya të'yatopi. Pascoaquë carniroa'hua tëpapiso pochin Quisocristo nani chiminin canpoa maré'. Ina imarama' ni'ton, nasha cancan quëtërinquëma'.⁸ Pascoa pita na'huasoil, ya'ipi ahuëpocatërinso' të'yatopi. Inapochachin canpoanta' ya'ipi co noyahué' yonquirëhuasopita a'poatëhua', noyasáchin niahua'. Ama huachi co noyahué' niahuasohué'. Noyápiachin cancantatëhua', no'të-quënáchin yonquia'ahua'.

⁹I'huanta' nani ninshitéranquëma'. “Ama monshihuaninsopitarë'quëma' nipayacosohué'. Ama inapita noya ni'cosohué’,” itëranquëma'.¹⁰ Na'a piyapi'sa' co Yosë imatonahué', monshihuanpi, apirapi, ihuatopi, mamanshi moshapi, inapopi. Hua'huayatërahué' piyapi ina pochin nipi ni'ton, inapitaso' nontacaso' ya'huërin. Co nontërehua-hué' naporini, co nanichitërihuahué' isoro'paquë ya'huëcaso'.¹¹ A'naquënso nipirinhue'. “Canta' imarahuë,” taponahué', monshihuanárin. A'nanta' apirarin. A'naquëonta' ipora huanta' mamanshi moshararin. A'napitanta' pinotapi, no'pirapi, ihuatapi, naporapi. Napoaponaraihué': “Quiyanta' imarai,” topi. Ama inapitarë'quëma' nipayacosohué'. Yosë nonpintapi ni'ton,

ama inapitarë'quëma' coshatocoso-hué'.¹²⁻¹³ Co Yosë imapisopitasohué' co canpoari ana'intacaso' ya'huërin-hué'. Tananpithua' Yosëri ana'inchin. Imarëhua capiniso nipirinhue' nipë-nëahuan' noya yonquicaso maré'. Co noyahué' nina'pi, niyontonama quëran ocoico', ténahué'.

Imarëhuasopita capini nanan anoyatacaso' ya'huërinso'

6¹ Canpita capini nanan ya'huë-huachin, ama nino'huicosohué'. Ma'sha nionpotohuatamara, ¿onpoatomata' coisëquë niquëparama'? Co inaso' imarinhue'. Quisocristo imarama' ni'ton, niyontonpatama', no'téquén pënëncó' nanan anoyachina'.² A'na tahuëri Quisocristo o'mahuachin, imarëhuasopita acoarinpoa' inarë'-quënpoa' hua'anëntacaso maré'. Coisë pochin nicatëhua', ya'ipi piyapi'sa' no'téquén sha'huitarihua'. Nani ina nitotërama'. Ina nitotatoma', ipora nanan ya'huëhuachin, anoyatacaso ya'huërin.³ Ayaro' tahuëri anquëniro'santa' hua'anëntatëhua', coisë pochin no'téquén sha'huitarihua'. Nani inanta' nitotërama'. ¡Nanan isëquë co onpopinchin sacaihué' anoyatacaso'!⁴ Napoaton nanan ya'huëhuachina, co coisëquë nisha'huirapicamaso ya'huërin-hue'. Co inaso' Yosë imana'pihué' ni'ton, co canpoa pochin no'téquén yonquirinhue'.⁵ Tapanacamaso maré' pënënanranquëma'. ¿Co a'naya tëranta' niyontonamaquë noya yonquina'pi ya'huërin-hue' ti? ¡Ya'huërin mini, ténahué'! Nanan ya'huëhuachin, inari anoyachin.⁶ Canpitaso nipirinhue' imaramaso capini nipinotoma', nisha'-huirapirama'. Naporahuaton, coisëso' co Yosë natëpirinhue', inaquë niquë-pahuatamara, co noyahué' ninama'.

⁷Nisha'huirapihuatomara, co imapi-sopitahuë pochin niconama'. Ma'sha onpotohuachinênquëma', ¿onpoatonta' co ahuantëramahuë'? Ma'shanëma' matohuachinênquëma', tananpitëramama' naporini, noya noya niitomahuë'.
⁸Canpitaso nipirinhuë' co noyahuë' cancantatoma', imaramasopita capini niihuarama'. Naporahuaton, ninonpi-napitoma', nii'huërëterama'.

⁹Co noyahuë' nipsisopita co Yosë hua'a-nëntërinquë ya'coanpihuë'. ¡Nani ina nitotërama' ipora! Ama ninonpintoco-sohuë'. A'naquën co Yosë natëtonahuë', monshihuanapi. Mamanshi moshapi. Sa'ina' ya'huëtopirinahuë', a'na sanapi së'huapi. Quëmapi capini nisë'huapi. Taparosachin yonquipi. Inapita pochin nipsisopitaso', co Yosë'pa' pa'sapihuë'.
¹⁰A'naquëonta' ma'sha ihuatopi, apirapi, no'pipi, pinotopi. A'naquën a'napita ahuëatona', ma'shanëna' matopi. Ya'ipi co noyahuë' nipsisopita co Yosë hua'a-nëntërinquë ya'coanpihuë'.
¹¹Iráca a'naquëma' ina pochin nipiramahuë'. Sinioro Quisocristo imapatamara, oshanëma' inquitërinquëma'. Nani anoyacancantërinquëma' ni'ton, Yosë noya ni'ninquëma'. Ispirito Santo chachin catahuarinquëma' noya cancantacaso'.

Ma'marësona nonënpoa' Yosë acotërinpoaso'

¹²“Ma'sona tëranta' yanipatëhua', noya nicacaso',” topi a'naquën. Napoaponahuë', co ya'ipi ninëhuasopita catahuarinpohuë' noya cancantacaso marë'. Napoaton ma'sona tëranta' anishacancantohuachinco, co nisarahuë'. Ano'quihuachinco.
¹³A'naquën napopi: “Cosharo' ya'huërin anpopitë marë'. Anpopitënta' ya'huërin coshoro marë',” topi. Inaso nipirinhuë', a'na tahuëri Yosë nohuanton, coshoro', anpopitë', inapita ta'huantarin. Ni'ton,

co coshatërehuaso marë' oshahuanëhuahuë'. Napoaponahuë', monshihuanacaso' pa'pi co noyahuë'. Co Yosë nohuantërinhuë' monshihuanacaso'. Co ina marë' nonënpoa' acotërinpohuë'. Sinioro natëcaso marë' acotërinpoa'. Nonënpoanta' nicha'ërin.
¹⁴Yosë nohuanton, Sinioro Quisoso nanopiantarin. Inari chachin chiniquéen nanantaton, nonënpoa' ananpitaantarinpohuë'.

¹⁵Quisocristo imapatëhua', ina nonën pochin ninëhua'. Nani ina nitotërama'. Ina nitotapomarahuë', ¿noya ipora monshihuanapi monshitacaso' to? ¡Co onporonta!
¹⁶Yosë quiricanênquë naporin: “Quëmapiri sanapi mapachina, cato' piyapi niponahuë', a'naíchín pochin Yosëri ni'nin,” tënin. Canpitaso' monshihuanapi ichihuë'ëpatama', ina pochin cancantarama'. Inapohuatama', co Quisocristo imamiataramahuë'.
¹⁷Quisocristoíchín imapatëhua', ina pochin cantarëhua'.

¹⁸Napoaton ama pi'pisha tëranta' monshihuanacosohuë'. Ihuatacaso', no'picaso', inapita nicacaso' co noyahuë', nipirinhuë', co atapicancaninpohuë'. Monshihuanpatama', nitapicancanarama'. Nonëmanta' tapiarama'.
¹⁹Quisocristo imapatëhua', Ispirito Santo ya'coancantërinpoa'. Nani ina nitotërama'. Yosë a'patimarinpoa' ni'ton, cancanënpoaquë chachin ya'huërarin. Napoaton co huachi canpoara nohuantërehuasopita nicacaso' ya'huërinhuë'. Yosë chachin hua'anëntërinpoa'.
²⁰Quisocristo chiniquéen parisitaton, chiminin nicha'ëinpoaso marë'. Nicha'ërinpoa' ni'ton, ya'ipi nonënpoa quëran huarë' hua'anëntinpoaso' ya'huërin. Napoaton noyasáchin nico' a'napitanta' nicatënênquëma' Yosë chinochina'.

Yasa'arinsopita pënëninso'

7 ¹I'hua chachin ninshitatomaco, nisha nisha natanamaco ni'ton, sha'huichinquëma'. Quëmapi co

yasa'apachinhuë!, noya inaora ya'huë-caso!, ténahuë. ²Napoaponahuë!, na'a piyapi'sa' monshihuanapi ni'ton, na'con na'con quëmapi'sa' sa'aina!. Ama monshihuanacaiso marëhuë! sa'aina!. Quëmapi'sa' sa'inaráchin yonqui'ina!. Inapochachin sanapi'santa' so'ináchin yonqui'ina!. ³Quëmapi'sa' sa'ina' noya nosoroatona!, ichihuë'ëina!. Inapochachin sanapi'santa' so'ina' nosoroatona!, huë'ëpaina!. ⁴Sanapi nani so'yahuachina, co inaora nohuantërinso' yonquicaso' ya'huërinhuë!. So'in nohuantërintonta' yonquicaso' ya'huërin. Quëmapi'nta' co inaora nohuantërinso' yonquicaso' ya'huërinhuë!. Sa'in nohuantërintonta' yonquicaso' ya'huërin. ⁵Ama nia'po'inasohuë!, niichihuë'ëina!. A'na tahuëriso nipirinhüë! quëmapi sa'inë chachin inahuara yonquinëna quëran nohuantohuachina!, na'con na'con Yosë nontacaiso marë' nisha huë'ëina!. Ina quëran naquëranchin nihuë'ëpanta'ina' ama nisha yonquicaiso marëhuë!. Ama hua'qui' nisha huë'ëcosohuë!, Satanasë minsëchinquëma'.

⁶Napoaton yasa'apatama!, sa'aco!, ténahuë. Co yasa'apatamahuë!, noyapaton. Co Yosë ina pochin camaipirinpoahuë!, ayonquirinco ni'ton, sha'huitaranquëma!. ⁷Caso nipirinhüë! co sa'ahuancohuë!. Co manta' sanapi së'huarahuë!. Yosë catahuarinco ahuan-ta'huaso!. Pa'sápato, a'chinárahüë. Na'a quëmapi'sa' ca pochin nipi naporini, noya niitonahuë!, topirahuë!. Co ya'ipi nanitopihüë! ca pochin nicacaiso!. Yosë catahuarinpoa' nisha nisha nicacaso!. A'naquën ina nohuanton, sa'arin. A'naquënso nipirinhüë! ina nohuanton, noya inaora ya'huërin.

⁸Co yasa'apatamahuë!, noya nisarama!. Inapochachin quëyorono'sa' co yaso'yantahuachinahuë!, noya nisapi.

Canta' caora ya'huarahuë. ⁹Napoaponahuë!, sanapi nohuantohuatama!, maco!. Noya sa'acaso!. A'naquën co sa'apachinahuë!, nisha nisha yonquipi. Sanapi së'huacaisoachin nohuantopi. Ina pochin cancantohuachina!, sa'aina!. Ina noya, ténahuë.

¹⁰Nani sanapi mapatama!, inarë-quëmáchin ya'huëco!, ténahuë. Co casáchin naporahuë!. Quisocristo sha'huitërinpoa' ni'ton, natëcaso' ya'huërin. Sanapi'santa' so'yahuachina!, so'ina' chinpitomiatacaso' ya'huërin. ¹¹Nipirinhüë!, co chinpitohuachinhuë!, ama huachi a'na quëmapi so'yachinsohuë!. So'in chachin chinpitantahuachin, noya nisarín. Quëmapi'santa' sa'apachina!, ama sa'ina' të'yachinasohuë!.

¹²Isonta' pënëantaranquëma!. Quisocristo isoro'paquë nipon, co napopirinhüë!, noya pënënanranquëma!, ténahuë. A'naquëma' co'huara Quisocristo imashatërapomahuë!, sa'arama!. Iporaso' imapiramahuë!, sa'amaso' co yaimarinhuë!. Noya yacapahuachinquëma!, ama të'yatocosohuë!. ¹³Canpitanta!, imoyaro'sa!, a'naquëma' imapomarahüë!, co so'yamaso' yaimarinhuë!. Co yatë'yatohuachinquëmahüë!, ama ta'ananpicosohuë!. Noya yacahuatoma!, chinpitoco!. ¹⁴A'naíchin imaponahuë!, noya ichiya'huë'in. Sa'in imapachina, so'ionta' Yosëri noya yonquiarin. Oshaquëran imapon nimara. Inapochachin quëmapi imana'pi nipachina, sa'ionta' Yosëri noya yonquiarin. Hui'ninpitanta' noya yonquiarin. Co ichiya'huëhuachinhuë!, hui'ninpita co onporonta' Yosë imaponahuë! nimara. ¹⁵Nichinpitacaso' noya noya nipirinhüë!, quëmapihuë! nipon, co imatonhuë! yapa'pachin, noya pa'in. Sanapinta' co imatonhuë! yapa'pachin, noya inanta' pa'in. “Noya nini'toma!,

ya'huëco',” itërinpoa' Yosë. ¹⁶Sanapi noya imaponahuë', so'inso' co onporonta' imaponhuë' nimara. Quëmapinta' noya imaponahuë', sa'inso' co imaponhuë' nimara. Co nitotërhua huë'.

¹⁷Yosë nohuanton, nisha nisha ninëhua'. Co napopináchin ninëhua huë'. Onpopinsona nicasëhua' Yosë imapatëhua', inachachin niahua'. Ya'huërhuaquë chachin sano yonquiatëhua', imahua'. Paato, ya'ipi imapisopita inachachin pënënarahuë'. ¹⁸A'naquëma' co'huara imashatërapomahuë', marca acotërinëinquëma'. Quisocristo imapatama', ama ina marë' tapancosohuë'. Naporahuaton, co marca ya'huëtöhuachinquëmahuë', ama niacotocosohuë'. ¹⁹Co marca yonquicaso' ya'huërinhuë'. Yosë natëcasorachin yonquico'. ²⁰Ya'n nan Quisoso imapatama', onpopinsona nicasëma' imapatama', inachachin nisáco'. Ama a'na' a'na' pochin yonquicosohuë'. ²¹A'naquëma' patron marërachin sacatohuatama', ama ina marë' sëtocosohuë'. Nipirinhuë' nanitohuatama', pipimiatatoma', canpitaora marë' sacatoco'. ²²Patron marë' sacatapomarahuë', Yosë huayonpachinquëma', oshanëma' inquitatëinquëma', nicha'ërinquëma'. Ina yonquiatoma', co huachi sëtacaso' ya'huërinhuë'. Inapochachin a'naquëma' co patron asacatopirinquëmahuë'. Yosë nicha'ërinquëma' ni'ton, ina na'con na'con natëcamaso' ya'huërin. Yosë piyapinënpita ninama'. ²³Quisocristo chiminaton, nicha'ërinquëma'. Inasáchin natëtoma', yonquico'. Ama piyapi'sa marëáchin sacatatoma', Yosë naniantocosohuë'. ²⁴Napoaton iyaro'sa' ya'n nan imapatama', onpopinsona nicasëma' imaramaso chachin nisáco'. Yosë ni'sarinquëma'.

²⁵Iporaso' co sa'arinsopitahuë', co so'yarinsopitahuë', inapita ma'sona

onpocaso' sha'huichinquëma'. Quisocristo isoro'paquë nipon, co ina a'chinpírinhuë', catahuarinco no'tëquën pënëna'huaso'. Nosoroatonco, acorinco nanamën a'china'huaso marë'. Napoaton nanitërama' natëamacoso', tënahuë'. ²⁶Ipora tahuëri'sa' sacai' imacaso', na'con aparisitarinënpoa'. Napoaton onporamasona ya'huapoma', inachachin ya'huëco'. ²⁷Sa'ahuanpatama', ama tël'yatocosohuë'. Co sa'ahuanpatamahuë', noya canpitaora ya'huëco'. ²⁸Napoa-pomahuë', sanapi nohuantohuatama', maco'. Noya sa'acaso'. Inapochachin nano'santa' yaso'yahuachina', noya nisapi. Co ina marë' oshahuanapihuë'. Nipirinhuë', sa'ahuano'sa', so'yahuano'sa' inapitaso' saca sacai' ya'huapona'. Co nohuantërahuë' canpitaso' ina pochin nicacamaso'.

²⁹Ni'co', iyaro'sa'. Yosë nohuanton, co hua'qui' isoro'paquë ya'huarihuahüë'. Napoaton sa'ahuanpatama', ama sa'amachin yonquicosohuë'. Yosë na'con na'con yonquico'. ³⁰A'na tahuëri sëtapomarahuë', ama sëtacamasorachin yonquicosohuë'. Yosë yonquiatoma', noya cancantoco'. A'na tahuërinta' capa cancantapomarahuë', ama inasáchin yonquicosohuë'. Ma'sha pa'anacasona' ya'huëtöpirinquëmahuë', ama inasáchin yonquicosohuë'. ³¹Ya'ipi ma'sha isoro'paquë ya'huërin sopita a'na tahuëri ta'huantarin. Napoaton ma'sha ya'huëtöpirinquëmahuë', ama inapita na'con na'con yonquicosohuë'.

³²Nani ma'sha yonquihuatëra, sacai' Yosë marë' sacatacaso'. Co nohuantërahuë' canpitaso' nisha nisha yonquiatoma', napion cancantamaso'. Quëmapi co sa'in ya'huëtöhuachinhuë', co nani ma'sha yonquicaso' ya'huërinhuë'. Nanitërin Sinioroáchin yonquicaso'. ³³Sa'ahuano'saso nipirinhuë' nani ma'sha

yonquicaiso' ya'huërin. Sa'ina' noya ya'huëcaiso marë' na'con yonquiapi. ³⁴Co nanitopihuë' Yosëáchin yonquicaiso'. Inapochachin sanapi'santa' co so'yahuachinahuë', nanitopi ya'ipi cancanëna quëran Yosëíchin yonquicaiso'. Inasáchin yonquihuachina', na'con Yosë marë' sacatapi. So'yahuano'saso nipirinhüë', na'con ma'sha yonquicaiso' ya'huërin. So'ina', hua'huinpita, inapita noya nocomacaiso' ya'huërin.

³⁵Ina pochin a'chintëranquëma' yonquicamaso marë'. Co caso' camairanquëmahuë'. Noya yonquico' Yosë nohuantërinso' ayonqui'inquëma'. Noyasáchin nicacaso' ya'huërin. Yosë na'con na'con yonquiatoma', ina marë' sacatoco'.

³⁶Hui'nama' nani nanontohuachin, quëmapiri nohuantohuachin, ama apiratocoso'huë'. Noya macacaso' nipachina', "Maquë'," itoco'. Noya so'yain. Co ina marë' oshahuaninhuë'. ³⁷Nipirinhüë', co quëtacaso' nohuantohuatamahuë', noya inanta'. Hui'naonta' co yaso'yahuachinhuë', quëma pëinënuë' chachin ya'huë'in. Yaso'yahuachin, acoantoco'. ³⁸Nanon aso'yacaso' noya. Co'so' nohuantohuachinahuë', inanta' noya. Co so'yahuachinhuë', noya noya, topirahuë'.

³⁹Sanapi so'yahuachin, so'in chinpitacaso' ya'huërin. Napoaponahuë', so'ini ayananpihuachin, yaso'yantahuachin, noya so'yanta'in. Yosë imana'pi so'yachin. ⁴⁰Co huachi so'yantahuachinhuë', noya inanta'. Noya noya cantararin, topirahuë'. Ispirito Santo catahuarinco no'tëquën pënënta'huaso' tënhuë'.

Cosharo' mamanshi marë' acopiso'

8 ¹A'naquën ma'sha tëparahuatona', nosha acopi mamanshi chinotacaiso marë'. "¿Noya ipora ina nosha

pa'angatë' capacaso' ti?" itëramaco ni'ton, sha'huichinquëma'. Tëhuë'nchachin iyaro'sa' co mamanshisó' nanpirinhüë', nitotërehua'. Nani na'con nitotarihuarahüë', co a'napita nosorohuatëhuahuë', topinan quëran nitotatëhua', ninocanarihua'. Nipirinhüë', piyapi nosorohuatëhua', catahuarëhua' noya noya Yosë imacaiso marë'. ²A'naquënso': "Ya'ipi nitotërai" topirinhüë', na'con pahuantarin no'tëquën yonquicaiso'. ³Napoaponahuë', Yosë nosorohuatëhua', ina pochin cantararihua'. Ina quëran Yosë nohuitatonpoa', noya ni'sarinpoa'.

⁴Nosha mamanshi chinotacaiso marë' acopiso' a'chinchinquëma' nitotoco'. Co mamanshi nanpirinhüë'. Co ina chinotacaso' ya'huërinhuë'. Tata Yosëíchin chinotacaso' ya'huërin, tënëhua'. ⁵A'naquënso' nipirinhüë' nisha nisha ma'sha isoro'paquë ya'huë'insopita moshapi. Inápaquë ya'huë'insopitanta' moshapi. Nisha nisha ya'huërin, "yosë" ta'tona', moshapi. "Inapita natëcaso' ya'huërin," topi. ⁶Canpoaso' nipirinhüë' Tata Yosëíchin chinotërehua'. Ya'ipi ma'sha ninin. Ina marë' acorinpoa'. Quisocristoíchin hua'anëntërinpoa'. Ina nininpoa'. Nani nicha'ërinpoa' ina nohuitatëhua' nanpicaso marë'.

⁷Napoaponahuë', a'naquënso' co ina nitochátërapihuë'. Iráca mamanshi chinotopirinhüë', Quisocristo imapachinara, mamanshi a'popi. A'popirinhüë', ipora huanta' co cancanëna quëran natëyátërapihuë'. "Nosha mamanshi marë' tëpapiso' ca'patëhua', mamanshi chachin chinotarëhua'," taponaraihuë' ca'pachina': "Oshahuanëhua'," ta'tona', co huachi noyápiachin cantantopihuë'. ⁸Tëhuë'nchachin ca'patëhua', co ina marë' oshahuanëhuahuë'. A'pohuatëhua', co ina marë' Yosë noya noya ni'ninpoahuë'. Co inaso' coshoro' yonquirinhüë'.

Cančanënpoa quëran noya yonquicaso' na'con na'con nohuantërin. ⁹Nipirinhüë', ya'ipi nosha ca'patama', ni'cona a'napita anishacancantotama'. A'naquën imasapirinhüë', co Quisocristoíchin natëyátërapihüë'. Nisha nisha të'huatapi. ¹⁰“Ya'ipi nosha noya capacaso',” ta'toma', noya ca'nama'. A'na tahuëriso nipirinhüë' mamanshi moshapiso' pëiquë pa'patama', inaquë coshatarama'. Inaquë coshatasëma', të'huatona'pi nicatëinquëma': “Mamanshi marë' acopiso' noya capacaso',” tapon nimara. Ina quëran: “Canta' nipa-chin ca'i,” ta'ton, ina nosha capon. Ina ca'pachin, “Oshahuanahuë caso huachi,” ta'ton, co noyahuë' cancantarin. ¹¹Canpitaso' nitotatoma', noya capomarahüë', të'huatona'pi atapicananarama'. Ina marënta' Quisocristo chiminin. ¹²Të'huatona'pinta' imapohanahuë', co ya'ipi cancanën quëran imarinhüë' ni'ton, nisha nisha të'huatarin. Nonanatëinquëma', ca'pachin, co noyahuë' cancantapon. “Ma'cha onpo'iya. Co noyahuë' ninahuë’,” tapon. Ina aoshahuanpatama', Quisocristonta' co noyahuë' ni'sarinquëma'. Ina marë' canpitanta' oshahuanarama'. ¹³Ya'ipi cosharo' noya capacaso nipirinhüë', a'na tahuëri nosha capasoco iyahuë niconco nishacancantohuachin, co huachi ina nosha ca'sarahüë'. Iyahuë nosoroato, co pi'pian tëranta' nohuantërahuë' anishacancanta'huaso'.

Quisocristori acorinsopita

9 ¹Co inso piyapi tëranta' camairincohuë'. Quisocristo chachin acorinco nanamën a'china'huaso marë'. Inápaquë panantarinso' piquëran cari ni'nahuë. Ina catahuarinco a'china'huaso'. A'chintohuatëinquëmara, canpitanta' imarama'. ²“Co Quisocristo

chachin acorinquënhüë',” itërinaco a'naquën. Canpitaso nipirinhüë' co napotaramacohüë'. A'chintohuatëinquëmara, Quisocristo imarama' ni'ton, acorincoso' nitotërama'.

³Nocanpachinacora, no'tëquën iso pochin sha'huitërahuë: ⁴A'chintohuatëinquëmara, a'camacoiso' ya'huërin. Yamorohuato, o'shitamacoisonta' ya'huërin. Nohuantërai naporini, noya ma'paitëinquëmahüë'. ⁵A'napita Quisocristori acorinsopitaso', sa'atona' sa'inarë' iratopi. Nanamën a'chinacaiso marë' pa'pachinara, sa'inë chachin pa'pi. Quisocristo iinpita, Pitro, inapitanta' inapopi. Nohuantërai naporini, quiyanta' Quisocristo imarinsos' macato, inarocoi chachin irachitohüë'. ⁶Pirnapirë'co a'chintarainquëma' ni'ton, a'camacoiso' ya'huëpirinhüë'. Quiyaora sacatato, coshatërai. Ma'shanta' pahuantohuachincoira, quiyaora pa'anai. A'napitaso' topinan ma'parinëinquëma'. ⁷Ni'co', iyaro'sa'. Sontaro ya'conpachinara, co cosharonën pa'anacaso' ya'huërinhuë'. Capacaso', a'mocaso', inapita topinan quëtopi. Inapochachin opa sha'pachina, hua'anëni inaora macaton, irorin. Co ina marë' pahuëretacaso' ya'huërinhuë'. Ohuica pë'tahuana'pinta' nohuantohuachina, ohuica sho'shoi' shi'shiaton, o'orin. ⁸Co piyapi'saráchin ina pochin yonquipihüë'. Yosë quircanëinquënta' Moisésë naporin: ⁹“Toro asacatohuatama', a'caco'. I'nataton to'norayahuachin, ama tonpoanantocohüë'. Tananpitoco' pi'pian pi'pian coshachin,” tënin iráca ninshitaton. Co toroáchin yonquiaton, Yosë naporinhüë'. ¹⁰Canpoanta' yonquiatonpoa', quiricanëinquë aninshitërin. Quëmapi iminpachina, co topinan sha'ninhüë'. “Nito-huachin, masarahüë,” ta'ton, sha'nin. Ina quëran sha'ninso' cayahuachina,

manin. ¹¹Inapochachin quiyanta' Yosë nanamën a'chintërainquëma' noya noya cancantacamaso marë'. Ina marë' ma'sha pahuantohuachincoi, topinan quëtëramacoi naporini, noya niitonhuë'. ¹²A'napitaso' a'chintohuachinquëmara, ma'sha topinan quëtërama'. Quiyaso' na'con na'con a'chintërainquëma' ni'ton, na'con na'con quëtamacoiso' ya'huëpirinhuë'.

Napoaponahuë', co manta' topinan ma'parainquëmahuë'. Ma'sha pahuan-topirincoihuënta', ahuantërai. Piyapi'sa' noya noya Quisocriso nanamën natanacaiso marë' co manta' ma'patëraihuë'. A'chinahuë quëran canarahuë naporini, co onpopinchin noya ni'itonacoihuë' nimara, tënahuë. ¹³Íraca a'naquën Yosë chinotopiso pëiquë sacatohuachinara, inaquë chachin coshatopi. Ma'sha Yosë chinotacaiso marë' tëpahuachinara, patoma ca'pi. Topinan quëtohuachinara, noya ca'pi. Nani ina nitotërama'. ¹⁴Inapochachin Quisocrisonta' sha'huitërinpoa'. “Nani tahuëri nani tahuëri Yosë nanamën a'chinpachina', natanpisopitari ma'sha quëchina' nancaiso marë',” tënin. ¹⁵Ina nipirinhuë', co manta' ma'paranquëmahuë'. Co ina marë' ninshitëranquëmahuë'. Co manta' nohuantërahuë'. Caora sacatato, a'chinarahuë. Ina marë' noya cancantërahuë. A'chintëranquëmaso marë' pahuërëamacoso' ya'huërin naporini, chimina'huaso' noya noya niitonhuë'. Topinan nohuantato, a'chintëranquëma', tënahuë.

¹⁶A'naquën: “Yosë nanamën a'chinahuëso marë' caso' noya noyaco,” topi. Caso nipirinhuë' co caora nohuanto a'chinahuë'. Co ina marë' noya noyacohuë'. Quisocriso acorinco nanamën a'china'huaso marë'. Co'so' a'chinpatohuë', jma'huantacha nisarahuë

paya! ¹⁷Caora nohuanto, a'chinahuë naporini, ina marë' canaitohuë'. Nipirinhuë', ina sha'huitërinco ni'ton, a'china'huaso' ya'huërin. ¹⁸Napoaton nanamën a'chinpatëra, co manta' ina marë' ma'patërahuë'. Cosharo', ma'sha, inapita quëtïnacoso' ya'huëpirinhuë', co manta' ma'patërahuë'. Topinan a'chinahuë. Ina marë' nóya cancantërahuë.

¹⁹Co insonta' pahuërërincohuë' ni'ton, co insonta' camaincoso' ya'huërinhuë'. Nipirinhuë', caora nohuanto, ya'ipi piyapi'sa' catahuarahuë. Na'con na'con piyapi'sari Quisocriso imacaiso marë' a'chinarahuë. ²⁰Cotioro'sa' a'chintohuatëra, inapita pochin ninahuë inapitanta' imacaiso marë'. Co Moisësë pënëntërinso' natëca'huaso' ya'huëtöpirincohuë', cotioro'sa pochin ninahuë natanacoso marë'. Inapitanta' Quisocriso natëcaiso' nohuantërahuë. ²¹Nisha piyapi'saso' co Moisësë pënëntërinso' natëpihuë'. Napoaton inapita a'chintohuatëra, co ya'ipi Moisësë pënëntërinso' natërahuë'. Co ina natëpirahuë', Quisocriso natëto, noya ninahuë. Nisha piyapi'sarinta' imacaiso marë' Quisocriso nanamënáchin a'chintërahuë. ²²A'naquëonta' imaponahuë', co ya'ipi cancanëna quëran natëyátërapihuë'. Inapitanta' co nocanahuë'. “Caso' noya noya imarahuë,” co itërahuë'. Inapita pochin ninahuë natanatonaco, noya noya Quisocriso imacaiso marë'. Ya'ipi piyapi'sa' nosoroato, sanoanan quëran a'chintërahuë caraya tëranta' cha'ëcaiso marë'. ²³Ina pochin Yosë nanamën a'chinpato, na'con na'con piyapi'sari ina nohuitapi anta'. Ina marë' canta' noya cancantërahuë.

²⁴Quëmapi'sa' nicanacaiso marë' ta'ahuachinara, a'naíchin canatërin. Nani ina nitotërama'. A'napitaso' co chiníquën ta'atonahuë', co canatöpihuë'.

Canpitanta' chiniquen ta'apiso pochin cancantatoma', na'con yonquico' noya noya cancantamaso marè'. ²⁵Quëmapi'sa' yanicanahuachinara, nani tahuëri ta'aräpi noya noya no'quicaiso marè'. Ta'acaisorächin yonquipi. Canatohuachinara, yancotè' huëron quëran nipiso' quëtopirinuahuè', inaso' a'naroächin ahuirin. Canpoaso nipirinuahuè' noya nipatèhua', Yosè'pa' acanarinpoa'. Inatohua' co manta' mocsarinhuè'. ²⁶Caso' co nisha nisha yonquirahuè'. Noya ni'tatè' ta'arëso pochin Yosè natëca'huasorächin yonquirahuè. Co topinan ya'huërahuè'. Co papinanguë ahuëtërëso pochin ninahuè'. Yosè nohuantërsorächin ninahuè. ²⁷Co noyahuè' yonquihuatëra, a'naroächin naniantërahuè. Co nohuantërahuè' pi'pian tëranta' oshahuanaca'huaso'. Nohuantaso' Yosè marè' sacatarahuè. A'napita na'con pënënpirahuè', co caso' noya nipatohuè', co Yosè noya ni'sarincohuè', co acanaarincohuè', tënahuè.

Ama mamanshi moshacaiso marëhuè' pënënsino'

10 ¹Iräca napopisopita iyaro'sa', yonquico'. Iräca cotio mashocoro'sa' Iquipito quëran pipirahuatona', Moisésè imapi. Yosè nohuanton, chitoro' ya'norin imacaiso marè'. Naporahuatona', Quëhuai' marè pëntonahuatona', ya'ipiya cha'ëpi. ²Marè quëran cha'ërahuatona', Moisésè imapi. Chitoronta' quëchitërarin. (Inapochachin iporasos' Quisocrisoto natërëhua' ni'ton, aporihuanatèhua', imarëhua'.) ³Iräca inotëro parti pa'pachinara, Yosè nohuanton, nani tahuëri no'paquë cosharo' ya'nohuachina, ya'ipiya coshatopi. ⁴Inaquëso' co i'sha ya'huëpirinuahuè', Yosè nohuanton, na'pi quëran pipirin, ya'ipiya o'opi. Quisocrisotos' ina na'pi pochin ninin.

Pa'pachinara, co quënanpirinuahuè', inari na'con catahuarin cha'ëcaiso marè'. ⁵Inapotopirinuahuè', cotioro'saso' co noyahuè' cancantopi. Na'con na'con co natëpihuè' ni'ton, Yosëri co noyahuè' nicaton, ana'intërin. Ina nohuanton, inaquë chachin chiminpi.

⁶Pënëinpoaso marè' iräca ina ninshitërin. Inapitaso' co noyahuè' yonquipi. Nani ma'sha noyapatopi. Ama inapita nonahuansohuè'. ⁷Inapitaso' mamanshi moshapi. "Moshatacaiso marè' pita nipi. Huënsërahuatona', coshatopi, o'opi. Ina quëran nansarahuatona', capa cancantopi," tënin Yosè quiricanënguë. Canpitaso nipirinuahuè' ama inapita pochin nicosohuè'. ⁸Ina quëran a'napita monshihuanpi. Ina marè' Yosëri ana'intërin. Ina nohuanton, cato shonca cara huaranca piyapi'sa' chiminpi. A'na tahuëri'ichin nipirinuahuè', inanapo chiminpi. Ina yonquiatoma', ama manta' monshihuanacamaso' yonquicosohuè'. ⁹Naporahuatona' Sinioronta tënipi: "Co nimara ana'intarinpoahuè'," ta'tona', co noyahuè' nipi. Ina marè' ya'huanatona', na'a chiminpi. ¹⁰Ama Yosè no'huitëhua' tarëtahuasohuè'. "Co Yosè noya catahuarinpoahuè'," topi a'naquën. Napoaton Yosëri anquëni a'paimarin inapita tëpacaso marè'.

¹¹Yosè nohuanton, iräca napopisopita quiricanënguë ninshitopi pënëinpoaso marè'. Inapita pochin nipatèhua', ana'intarinpoa' canpoanta'. Nani ana'intacaso' tahuëri naniriarin. ¹²A'naya a'nayanquëma' ni'cona oshahuantama'. "Caso' noya piyapico. Co onporonta' Yosè a'poarahuè'," ama tocosohuè'. ¹³Sopai ya'ipi piyapinpoa' sha'huitërinpoa' co noyahuè' nicacaso marè'. Yosëso nipirinuahuè' catahuarinpoa'. A'naya a'nayanpoa' co nanitërehuasohuè' nitataton, ni'sarinpoa'. "Tananpitëquè',"

itohuachina, co sopai nanitërinhuë' aquëtë' tëniinpoaso'. Cancanënpoa quëran huarë' Yosë natëhuatëhua', co sopai minsëarinpoahuë'. Ma'sha onpopirëhuahuënta', Yosë ananitarinpoa' ahuantacaso'. Yosë chachin catahuarinpoa' sopai minsëcaso marë'.

¹⁴Napoaton iyaro'sa' ama pi'pisha tëranta' mamanshi moshacosohuë'. Nosororanquëma' ni'ton, pënënananquëma'. ¹⁵Canpitaso' nitoyonquirama'. Sha'huitëranquëmaso' yonquico' no'tëquën nitotacamaso marë'. ¹⁶Niyontonpatëhuara, Quisocriso chiminins'o yonquirëhua'. “Quiya marë' Siniro huënainën pa'nin ni'ton, 'Yosparinquën' tënai,” itatëhua', huënainën pochin ninins'o o'orëhua'. Cancanënpoa quëran huarë' yonquiatëhua', o'opatëhua', huënainën napopináchin yonquirëhua'. Ina quëran cosharo' ina nonën pochin ninins'o së'panahuatëhua', ca'nëhua'. “Tëhuëenchachin canpoa marë' Quisocriso nonën ohuampi,” ta'tëhua', napopináchin yonquirëhua'. ¹⁷Quisocriso yonquiatëhua', ina cosharo' ca'nëhua'. Na'aquënpoa' nirihuarahuë', Quisocriso imarëhua' ni'ton, a'na huëntona pochin ninëhua'. Napopináchin yonquirëhua'.

¹⁸Israiro'sa' napopisonta' yonquico'. Ma'sha Yosë chinotacaso marë' tëparahuatona', ahuiquitopi. Pi'pian nosha acopiso' ca'pi. Yosë yonquiatona', coshatopi. Inapoatona', Yosë chinotopi. ¹⁹Mamanshis'o co nanpirinhuë'. Co chinotacasohuë' nipirinhuë', a'naquëni moshapi. Ma'sha inapita chinotacaso marë' tëpahuachinara, topinan quëran napopirinahuë', co mamanshiri ni'ninhuë', co nataninhuë'. ²⁰Nisha piyapi'saso nipirinhuë' mamanshi moshacaiso marë' ma'sha tëpahuachinara, co Yosë yonquiphuë'. Sopairo'sa'

yonquipi. Co caso' nohuantërahuë' canpitanta' sopairo'sa' yonquicamaso'. ²¹A'naquën mamanshi moshacaiso marë' pita nipi. Sopairo'sa' yonquiatona', napopi. Siniro yonquihuatama', co sopairo'sa' yonquicamaso' ya'huërinhuë'. Napoaton amatohuachinëinquëma', ama pacosohuë'. Quisocriso chiminins'o yonquiatoma', coshatërama', o'orama'. Napoaton ama sopairo'sa' yonquiatoma', coshatocosohuë', o'ocosohuë'.

²²Sopairo'sa' yonquihuatama', Yosë a'pitatëinquëma', no'huiarinquëma'. ¿Ina nohuantërama' ti? ¿Inaso' chini chiniquën nanantërin! Canpoaso' co ina pochin chiniquën nanantërehuahuë'.

A'napita nosorocaso' ya'huërinso'

²³“Ma'sona tëranta' yanipatëhua', noya nicacaso’,” topi. Napoaponahuë', co ya'ipi ninëhuasopita catahuarinpoahuë' noya cancantacaso'. Tëhuëenchachin ya'ipi noya nicacaso nipirinhuë', co ya'ipi catahuarinpoahuë' a'napita achinicananacaso'. ²⁴Napoaton a'napitanta' noya noya imacaiso marë' catahuaco'. Canpitaora costaramaso' ama aquëtë' yonquicosohuë'. A'napita na'con na'con yonquico'.

²⁵Nosha mircatoquë ya'huëhuachin, pa'anatoma', ca'co'. Ama manta' natanatapomarahuë', ca'co'. “¿Mamanshi chinotopiso peiquë ma'patëran?” ama itocosohuë'. Ama nisha nisha yonquiapomarahuë', ca'co'. ²⁶Tata Yosëri ya'ipiro'pa' ninin. Ya'ipi ma'sharo'santa' noya ninin.

²⁷A'na tahuëri coshatapatarama'. Co imarinsohuë' amatohuachinquëma', nohuantohuatama' paco'. Nosha acotohuachinëinquëma', “Mamanshi marë' acopiso' nimara,” ama tapomarahuë', ca'co'. ²⁸Nipirinhuë', a'na piyapi

sha'huitohuachinquëma', "Iso nosha mamanshi chinotacaso marë' acopiso'," itohuachinquëma', ama ca'cosohuë'. Sha'huitërinquëmaso' nosoroatoma', ama ca'cosohuë'. ²⁹Ca'patama', co ina marë' oshahuanaramahuë'. A'naquënso nipirinhüë' ni'pachinëinquëma', nisha nisha yonquiamara. Ina nosoroatoma', ama ca'cosohuë'.

A'naquëmaso nipirinhüë', itaramaco: "¿Ma'marëta' a'napita yonquiato cosharo' a'poca'huaso' ya'huërin? ³⁰Yosparinquën Siniro,' itahuato, noya caso' ca'nahuë. ¿Onpoatonta' ina marë' co noyahuë' ni'ninaco?" topiramahuë'. ³¹Ma'sona tëranta' nipatama', Yosë yonquiatoma', noya nico' a'napitanta' Yosë noya yonquicaiso marë'. Napoaton coshatohuatama', o'opatama', ma'sona tëranta' nipatama', ina yonquico'. ³²Ama insonta' anishacancantocohuë'. Cotioro'sa', nisha piyapi'sa', Quisocriso imapisopita, ya'lipiya nosorocaso' ya'huërin. ³³Caso' ya'ipi piyapi'sa' yonquirahuë. Catahuarahüë noya Yosë imacaiso marë'. Co caora costarahuëso' yonquirahuë'. A'napitanta' yacatahuarahüë inahuanta' Quisocristori anoyacancantacaso marë'.

11 ¹Caso' Quisocriso noya nonanahuë. Canpitanta' nonanatomaco, noya nico'.

Sanapi'sa' Yosë imapisopita

²Ma noyanquëma' iyaro'sa' ni'ton, na'con yonquiramaco. Yosë nanamën a'chintohuatëinquëmara, noya natëramaco. ³Isonta' iyaro'sa' a'chinchinquëma' nitotoco'. Co insonta' inaora nohuanton ya'huërinhuë'. Tëhuëinchachin natëcaso' ya'huërin, tënahuë. Sanapi'saso' so'ina' natëina'. Quëmapi'santa' Quisocriso natëina'. Quisocriso' Tata Yosë natërin.

⁴Quëmapinpoa' niyontonëhuaquë Yosë nontohuatëhua', ama motënpoa' niimomototahuasohuë'. Niimomotohuatëhua', co Quisocriso natërehuahuë'. Inapochachin pënëntohuatëhua', ama niimomototahuasohuë'. ⁵Canpitanta', imoyaro'sa', niyontonëhuaquë Yosë nontohuatama', so'yama' natëtoma', niimomotoco'. Yosë anitotërinquëmaso' sha'huihuatamanta', niimomotoco'. Co niimomototohuatamahüë', noyá niya'itopiso pochin ya'noarama'. Ina pochin nipatama', so'yama' atapanarama'. ⁶Ni'co'. Sanapi'sa' co quëmapi'sa pochin niya'itopihuë'. Ya'ipi noyá niya'itopi naporini, tapaintonahuë'. Napoaton imoyaro'sa' niimomotoco'. ⁷Quëmapinpoaso nipirinhüë' Yosë nontohuatëhua', ama motënpoa' niimomototahuasohuë'. Yosë nininpoa' ina pochin hua'anëntacaso marë'. Inasáchin, iyaro'sa', natëhuatëhua', nóya cantarihua'. Ina marë' acorinpoa'. Inapochachin sanapi'santa' so'ina' noya natëhuachina', nóya cantantapi. ⁸Quëmapi'ton Yosëri ninin. Ina quëran ahuë'ëtahuaton, a'na nininpitëraca' ocoitërin. Ina ocoitahuaton, ina quëran chachin sanapi ninin. ⁹Quëmapi'ton ninin. Ina piquëran sanapi ninin so'in catahuacaso marë'. ¹⁰Napoaton quëmapi'sa' chini chiniquën nanantopi. Sanapi'saso' so'ina' natëina'. Natëtona', motëna' niimomotochina'. Napohuachina', so'ina' natëpi ni'ton, anquënirosarinta' noya ni'sapi. ¹¹Napoaponahuë', Yosë napopináchin nosororinpoa'. Co quëmapi'saráchin nohuantërinhuë'. Sanapi'santa' nohuantërin. Quisocriso imapatëhua', napopináchin ni'ninpoa'. ¹²Ya'lipinpoa' Yosë nininpoa'. Quëmapi'ton nisahuaton, quëmapi nininpitën quëran sanapi ninin. Naporo quëran huarë' quëmapinpoanta' sanapi'sa

quëran nasitërehua'. Yosë nohuanton naporin.

¹³Iporaso' iyaro'sa', imoyaro'sa', cancanëma quëran yonquico' noya nicacamaso marë'. Niyontonpatama', ¿noya ipora sanapi'sa' co niimomototaponaraihuë' Yosë nontacaiso' to? ¹⁴Ni'co'. Quëmapi-poa' niya'itërehua'. Co ain a'pamacaso' nohuantërehuahüë'. ¹⁵Sanapi'saso nipirinhuë' ainën a'pamapi. A'pamahuachinara, noya ya'nopi. Yosëri naporopi ain quëtërin noyá niimomototacaiso marë'. ¹⁶A'naquëma' nisha yonquihuatama', isoíchin sha'huitaranquëma': Quiyaso' co nisha nisha a'chinaihuë'. Ya'ipi parti imapisopitanta' inachintopi.

Niyontompachinara, a'naquën co noyahuë' nipiso'

¹⁷Niyontompatama' iyaro'sa', noya nicacaso' ya'huëpirinhuë', a'naquëma' co noyahuë' ninama'. Co ina marë' noya ni'nanquëmahuë'. Napoaton pënënanranquëma'. ¹⁸Yosë chinotacaso marë' niyontompatamara, a'na huënton a'na huënton nicatoma', nino'huirama', natantërahuë. No'tëquën sha'huitërinaco, topirahuë'. ¹⁹Co ya'ipi cancanëma quëran imapatamahuë', nisha nisha yonquiarama'. Co napopináchin yonquiaramahüë'. Ina quëran Yosë cancanën manëhuasopita nohuitërinënpoa'. Co ya'ipinpoa' nisha nisha yonquirëhuahuë'. A'napitaso nipirinhuë' co noya yonquiatonahuë', co no'tëquën imapihuë'. ²⁰Quisocristo yonquicaso marë' niyontonatoma', coshatapomarahüë', co tëhuëinchachin chiminins'o yonquiramahüë'. ²¹A'naquëma' co ninosoroatomahuë', niapiratërama'. A'naroáchin canpitaora cosharonëma' ca'nama'. Co nipatomatëramahuë'. Inapotohuatamara, a'naquën tanapi. A'naquënso nipirinhuë' na'con o'otona',

no'pipi. Napoatoma', co nanitëramahuë' Quisocristo chiminins'o yonquiatoma' coshatacamaso'. ²²¿Co'na pëinëma' ya'huëtërinquëmahuë' inaquë coshatamaso', o'ocamaso'? ¿Onpoatonta' corto pëiquë chachin pahuantërinso-pita atapanarama'? ¿Ma'ta' ina marë' ichinquëma'? Co ina marë' noya ni'nanquëmahuë'.

Quisocristo chiminins'o yonquiatëhua', ca'nëhuaso'

(Mateo 26.26-29; Marcos 14.22-25;

Lucas 22.14-20)

²³Sinioro sha'huitërinco chachin nani sha'huitëranquëma'. Iráca Cotasëri Quisocristo sha'huirapirin. Sontaro'sari yamapachinara, naporos' tashi' ca'tano'sanënpitarë' coshatopi. Cosharo' masahuaton, ²⁴“Yosparinquën Tata Yosë,” itahuaton, sé'panin. Sé'panahuaton, a'naya a'naya quëtërin. “Ca nonëhuë pochin iso'. Ca'co'. Canpita marë' chiminarahuë. Niyontompatama', chiminahuëso' yonquiatomaco, pi'pian coshoro' ca'co',” itërin. ²⁵Nani coshatohuachinara, minëa'hua manin. “Huënainëhuë pochin iso'. Huënainëhuë pa'sarin ni'ton, nasha quëran canpitarë' Yosë anoyatërinso' sha'huichinquëma' imacamaso marë'. Chiminarahuë ni'ton, anoyacancantaranquëma'. Ca yonquiatomaco, o'oco'. Ipora quëran huarë' inapoatoma', yonquico,” itërin Quisosori. ²⁶Onporosona coshoro' ina nonën pochin ninins'o' ca'patama', huënainën pochin nininsonta' o'opatama', Quisoso chiminins'o' a'napita anitotarama'. Sinioro o'mantaquë huarë' inapoarama'.

Onpopinsona Quisoso chiminins'o' yonquicaso' ya'huërin

²⁷Ina marë' niyontompatama', ama topinan quëran ca'cosohüë'. Ama nisha nisha yonquiatoma', o'ocosohüë'. Co

Siniro nonën, huënnainën inapita noya yonquihuatamahuë!, oshahuanarama!.
²⁸Napoaton canpitaora yonquinëma quëran no'tëquën yonquico!. Pi'pisha tëranta! co noyahuë! yonquihuatama!, naniantoco!. Noyapiachinsáchin cancantatoma!, ca'co!, o'oco!.
²⁹Quisoso chimininsó! no'tëquën yonquicaso! ya'huërin. Topinan quëran ca'patama!, topinan quëran o'opatama!, na'con oshahuanarama!. Ina marë! Yosë ana'intarinquëma!.
³⁰Napoaton na'anquëma! caniorama!. A'naquëmanta! co chiniramahuë!. A'naquënso! ina marë! chiminin.
³¹Ya'ipi cancanënpoa quëran huarë! nitantiacaso! ya'huërin ni'ton, yonquia'ahua!. Co noyahuë! yonquirëhuasopita naniantohuatëhua!, co Yosë ana'intarinpoahuë!.
³²A'na tahuëri oshahuano'sa! ana'intomiatarin. Imarëhuasopitaso nipirinhüë!, ipora chachin pi'pian ana'intarinpoa! noya noya yonquicaso marë!. Ina quëran ayaro! tahuëri co ana'intomiatarinpoahuë!.

³³Napoaton iyaro'sa! noyápiachin cancantatoma!, Quisocristo chimininsó! yonquicaso marë! niyontonco!. Ina marë! niyontonpatama!, ama a'naroáchin ca'cosohuë!. Nininaco!. Ya'ipi nanihuatama!, napopináchin ca'co!.
³⁴A'naquën tanahuachina!, inahuara pëinënaquë coshachina!. Ina quëran noya niyontonpatama!, co Yosë ana'intarinquëmahüë!. A'na tahuëri pa'sarahüë nicaponquëma!. Naporo! na'con na'con a'chinchinquëma!.

Ispirito Santo nisha nisha catahuarinpoaso!

12 ¹Apira Ispirito Santo naporinsó! iyaro'sa!, a'chinchinquëma! no'tëquën nitotacamaso marë!. Ina tëhuënnachin catahuarinpoa! nohuantërinso! nicacaso!. A'naya a'nayanpoa! catahuarinpoa!.

²Íraca co Yosë natëyatërapomahuë!, nisha nisha yonquiatoma!, mamanshi mosharama!. Co nanpiton natanpirin-quëmahüë!, sopai nohuanton, inapita chinotërama!.
³Iporahuanta! a'naquëni co noyahuë! yonquirapitona! Quisocristo no'huiipi. Inapitaso! co Ispirito Santo natëpihuë!. Ispirito Santo ya'coancantohuachinpoa!, catahuarinpoa! Quisocristo natëcaso!. “Quisocristoíchin natërahuë. Inaso! hua'anëntërinco,” tënëhua!. Ispirito Santo nohuanton, naporëhua!.

⁴Yosë acorinpoa! nisha nisha nitotacaso marë!. Ispirito Santo chachin catahuarinpoa! noya nicacaso!.
⁵Siniro nohuanton, nisha nisha ninëhua! a'napita catahuacaso marë!. Nisha nisha niriuhuarahuë!, ya'ipinpoa! Siniro natërhüa!.
⁶A'naya a'nayanpoa! ananitërinpoa! nisha nisha nicacaso marë!. Ya'ipinpoa! Yosë chachin catahuarinpoa!.
⁷Co canpoara nanitopirëhuahuë!, Ispirito Santo ananitërinpoa! ma'sona ina nohuantërinso! nicacaso!. Catahuarinpoa! ni'ton, a'napitanta! catahuarihua! noya noya imacaiso marë!.
⁸Ispirito Santo nohuanton, a'naquën noyá nitotërin pënëntacaso!. No'tëquën yonquiaton, pënëntarin. A'naquëonta! noya noya nitotaton, a'chinarin.
⁹A'naquëonta! catahuarin chiníquën Yosë natëcaso marë!. “Yosë ya'ipiya nanitaparin,” ta'ton ina nontërin. Nontohuachina, Yosëri na'con catahuarin. A'nanta! Ispirito Santori catahuarin cania'piro'sa! anoyatacaso marë!.
¹⁰Ispirito Santo nohuanton, a'naquëonta! nanitërin sacai nininsó! nicacaso!. A'naquën Yosë yonquirinsó chachin cancanën quëran anitotërin a'napita sha'huitacaso marë!. A'naquëonta! Ispirito Santo nohuanton, macarisona catahuarinsó! nitoninorin. Co Ispirito Santoachin

yacatahuarinpoahué'. Sopairinta' piyapi'sa' catahuarin nonpintinpoaso maré'. Napoaton a'napita pënënpachinpoa', ninocaso' ya'huërin. Nonpin nanan nipachina, sha'huëtërinpoa' ama natëcaso marëhué'. A'naquëonta' Ispirito Santo nohuanton, nisha nananquë nonpiso pochin nonpi. A'napitanta' catahuarin ma'sona nisha nananquë topiso' sha'huicaiso'. ¹¹Ya'ipi imarëhuasopita catahuarinpoa'. A'naíchin Ispirito Santo niponahué', catahuarinpoa' nisha nisha nitotacaso'. Inaora nohuantërinso' ananitërinpoa'.

A'na huëntona pochin ninëhuaso'

¹²Nonënpoa' a'naíchin nipirinhué', nisha nisha ya'huëtërin. Ya'piranpoa', nantënpoa', imiranpoa', inapita ya'huëtërinpoa'. Inapochachin Quisocriso imarëhuasopita nisha nisha niriuhuarahué', a'na huëntoínchin ninëhua'. Nonën pochin Quisocriso ni'ninpoa'. ¹³Ispirito Santo chachin Quisocriso huëntonëquë aya'coninpoa'. Cotioro'sahué nipon, nisha piyapi'sahué nipon, napopináchin Yosë ni'ninpoa'. A'naquëma' canpitaora maré' sacatërama'. A'naquëma' nani tahuëri patronëma' asacatërinëquëma'. Nisha nishanpoa' nipirihuahué', Ispirito Santo catahuarinpoa'. Quisocriso imarëhua' ni'ton, huëntonëquë aya'coninpoa'. Aporintohuachinënpoara, a'na huëntoínchin ninëhua'. Ya'ipi imarëhuasopita Ispirito Santo ya'coancantërinpoa'.

¹⁴Nonënpoa' a'naíchin nipirinhué', nisha nisha ya'huëtërin. Nantënpoa', imiranpoa', ya'piranpoa', inapita pochin nininsopita ya'huëtërinpoa'. ¹⁵Nantëhuë nontërinco naporini, "Caso' co imirancohué'. Napoaton co nohuantancoso' ya'huërinhué'," itërinco naporini, co

no'tëquën nonchitoncohué'. Nantëhuënta' nohuantërahuë. ¹⁶Huëratëhuënta' nontërinco naporini, "Caso' quëma huëratëncó. Co ya'pirancohué'. Napoaton co nohuantancoso' ya'huërinhué'," itërinco naporini, co no'tëquën nonchitoncohué'. Huëratëhuënta' nohuantërahuë. ¹⁷Ya'piranpoáchin ya'huërin naporini, ¿ma quërantá natanchitërihuahué'? Huëratënpoáchin ya'huërin naporini, ¿ma quërantá imëchitërihuahué'? ténahuë. ¹⁸Yosëso nipirinhué' nisha nisha acotërinpoa'. Ina nohuanton, imiranpoa', nantënpoa', ya'piranpoa', inapita ya'huëtërinpoa'. A'naya a'naya nohuantërinquë chachin acotërinpoa'. ¹⁹A'naíchin ya'huëtërinpoa' naporini, co nonënpoa' inaichitonhué'. Napoaton nisha nisha acotërinpoa'. ²⁰Nisha nisha ya'huëtöpirinpoahué', a'naíchin nonënpoa' ya'huërin.

²¹Isonta' yonquico'. Ya'pirari imira nocanin naporini, "Quëmaso' napoan. Co nohuantëranquënhuë'," itërin naporini, co no'tëquën nonchitonhué'. Motënpoanta' co nantënpoa' nacanacaso' ya'huërinhué'. Ya'piranpoa', imiranpoa', motënpoa', nantënpoa', ya'ipi nohuantëréhua'. ²²Ni'co'. Ninopinënpoa', sa'poronënpoa', inapita pochin nininsopita co a'ninquëchin ya'noponahué', na'con na'con nohuantëréhua' nanpicaso maré'. Inapitaso' noya noya ananpirinpoa'. Co inapita ya'huëtërinpoahué' naporini, chimiintërihuahué'. ²³A'naquën nonënpoaquë ya'huërinso' co onpopinchin pa'yatëréhuahué'. Nipirinhué', inaso' noya noya a'motëréhua'. Taparonënpoapitanta' noya imotëréhua'. ²⁴Imiranpoa', ya'piranpoa', inapita co imotëréhuahué'. Nisha nisha ya'huëtöpirinpoahué', ya'ipi nohuantëréhua'. Yosë nohuanton, co a'ninquëchin nininsopitahué' na'con

na'con yonquirëhua'. ²⁵Nonënpoa' a'naíchin nipirinhüé', nisha nisha ya'huëtërin. Co nino'huitonahué', nicatahuapi. ²⁶Maquënpoa tëranta' iquin nipachina, ya'ipi ninatané'. Inapochachin maquënpoa tëranta' pa'yatohuachinënpoa', ya'ipi nonënpoa' capa cancantërin.

²⁷Canpoanta' imarëhua' ni'ton, a'na huëntoínchin ninëhua'. Nonën pochin Quisocristo ni'ninpoa'. A'naya a'nayanpoa' nohuantërinpoa'. ²⁸Yosë nisha nisha acorinpoa' imarëhuasopita capini nicatahuacaso maré'. Quisocristo isoro'paquë nipon, a'naquën acorin paatona' nanamën a'chinacaiso maré'. Inapita'ton Yosëri acorin. Ina quëran a'napitanta' acorin pënëntacaiso maré'. Naporahuaton, a'naquëonta' acorin Quisocristo nanamën a'chinacaiso maré'. Yosë nohuanton, a'naquën sacai' nininso' nanitaparín. A'naquën acorin cania'piro'sa' anoyatacaso maré'. A'naquën acorin a'napita catahuacaso maré'. A'naquën acorin hua'an pochin nicacaso maré'. A'naquën Yosë nohuanton, nisha nananquë nonpiso pochin nonin. ²⁹Co ya'ipinpoa' acorinpoahué' paatëhua' a'chinacaso maré'. Co ya'ipinpoa' nitopënëntëréhuahué'. Co ya'ipinpoa' Quisocristo nanamën a'chinacaso' ananitërinpoahué'. Co ya'ipinpoa' sacai' nininsopita nanitaparëhuahué'. ³⁰Co ya'ipinpoa' ananitërinpoahué' cania'piro'sa' anoyatacaso'. Co ya'ipinpoa' nisha nananquë nonëhuahué'. Nisha nanan natanpatëhuara, co ya'ipinpoa' nanitëréhuahué' ma'sona tëninso' sha'huicaso'. Co ya'ipinpoa' inachachin nicacaso' acorinpoahué'. Ispirito Santo nohuanton, nisha nisha ninëhua'. ³¹Yosë nontoco' Ispirito Santo catahuainquëma' noya noya nininsopita nitotatoma' a'napita catahuacaso maré'.

Ninosorocaso' ya'huërinso'

Napoaponahué', piyapi nosorocaso' noya nóya ténahué. Ina a'chinchinquëma'.

13 ¹Nisha nananquë nonpiso pochin nitononarihuarahué', co piyapi'sa' nosorohuatëhuahué', topinan quëran nonarihua'. Anquëni pochachin nonarihuarahuënta', co nosorohuatëhuahué', hua'na, canpana inapita irininso pochin Yosë nataninpoa'. ²A'naquënpoa' Yosë yonquirinso chachin nitotatëhua', sha'huitarëhua'. Ya'ipi nitotarihuarahué', co piyapi'sa' nosorohuatëhuahué', topinan quëran nitotarihua', co Yosë noya ni'sarinpoahué'. Yosë chiníquën natëtëhua', nontohuatëhua', motopi chi'huincacaso pochin nanitapapirëhuahué', co piyapi'sa' nosorohuatëhuahué', topinan quëran natëréhua', co Yosë noya ni'sarinpoahué'. ³Ya'ipi ma'shanënpoa' sa'ahuario'sa' quëtopirëhuahué', co tëhuënhachin nosorohuatëhuahué', topinan quëran quëtarihua'. “Pën quëran yatëpapirinacohuënta', imamiatarahué,” tarihuarahué', co piyapi'sa' nosorohuatëhuahué', co manta' Yosë'pa' canarihuahué'.

⁴Piyapi'sa' nosorohuatëhua', co yano'huirihuahué'. Noya nontatëhua', catahuarihuahué'. Piyapi'sa' nosorohuatëhua', co noyapatëhua', no'huirihuahué'. Co nocantarihuahué'. “Caso' noya noyaco,” co tarihuahué'. ⁵Piyapi'sa' nosorohuatëhua', co pi'pisha tëranta' atapanarihuahué'. Co canpoara nohuantëréhuasoachin yonquiarihuahué'. Tëhuënhachin nosorohuatëhua', no'huipirinënpoahuënta' co no'huirihuahué'. Pinopirinënpoahuënta', co ina yonquiarihuahué', naniantarihua'. ⁶Piyapi'sa' co noyahué' nipachina,

tëhuënchachin sëtarihua'. No'tëquën yonquihuachina', canpoanta' noya cancantarihua'. ⁷Co noyahuë' nanan natantohuatëhua', co a'naroáchin natëtarihuahuë'. Noya yonquiatëhua', natëarihua'. "Yosë nohuanton, oshaquëran noya cancantapon," ta'tëhua', ninarëhua'. Ma'sha onpotopirinënpoahuënta', ya'ipi ahuantarihua'.

⁸Ipora quëran huarë' ninosoromiatacaso' ya'huërin. A'naquën ipora Yosë yonquirinso chachin piyapi'sa' sha'huitapirinahuë', a'na tahuëriso' co huachi ina sha'huitacaso' ya'huaponhuë'. A'naquëonta' nisha nananquë nonpiso pochin nonpi. A'na tahuëriso nipirinhüë' co huachi ina pochin nonacaso' ya'huaponhuë'. Iporaso' a'naquën nitotërin a'chinacaso'. A'na tahuëri co huachi ma'sha anitotacaso' ya'huaponhuë'. Inapitaso' co ya'huëmiatarinhüë'. Nipirinhüë', ninosorocasoso' ya'huëmiatarin. ⁹Iporaso' co ya'ipi nitotërëhuahuë'. Co inquënpoa tëranta' no'tëquënáchin nitopënëntërëhuahuë'. ¹⁰A'na tahuëriso nipirinhüë' Yosë'pa' ya'ipi nitotarihua'. Naporo' co a'chinacaso' ya'huaponhuë'. Co huachi nipënënacaso' ya'huaponhuë'. Ya'ipi noya nisapi.

¹¹Iráca hua'huatarihua', hua'huasha pochin nonëhua', hua'huasha pochin yonquirëhua'. Iporaso nipirinhüë' nani mashotërëhua'. Co huachi hua'huasha pochin nonëhuahuë'. Co huachi hua'huasha pochin ninëhuahuë'. ¹²Hua'na huënaratërinquë sacóshin hua'yanënpo' quënanë'. Inapochachin iporaso' pi'pisha Yosë nohuitërëhua'. Yosë'paso nipirinhüë' a'ninquëchin Yosë nohuitarihua'. Iporaso' co Yosë pochin ya'ipi nitotarihuahuë'. Inatohuaso nipirinhüë' ya'ipiya nitotarihua'. Yosë noyá nohuitërinpoa'. A'na tahuëri

canpoanta' inapochachin ina noya nohuitontarihua'. ¹³Cancanënpoa quëran huarë' Yosë natëcaso' ya'huërin. "Co onporonta' nonpintarinpoahuë'," ta'tëhua', inasáchin ninacaso' ya'huërin. Ninosorocasonta' ya'huërin. Yosëso' na'con na'con nohuantërin ninosorocasos'.

Nisha nisha nananquë nonpiso'

14 ¹Napoaton iyaro'sa', noya ninosoroco'. Ina quëran Yosë nontoco' Ispirito Santo catahuainquëma' ma'sona nohuantërinso' nicacamaso'. Yosë nanamën sha'huicaso' na'con na'con nohuantoco'. ²A'naquën Ispirito Santo nohuanton, nisha nananquë nonpiso pochin nonpi. Co natanchináchinhuë' nonpi ni'ton, co piyapi'sa' natanpihuë'. Yosëíchin natanin. Yosëri ayonquirinso' nonsapirinhüë', co a'napitari natanpihuë'. ³Napoaponahuë', Yosë nanamën sha'huitohuatëhuaso', noya nataninënpoa'. Ina yonquihuachina', noya noya imasapi. Sha'huitohuatëhua', achinicananarihua'. Sëtopirinahuë', natanatënënpoa', chiníquën cancantapi. ⁴Nisha nananquë nonpiso pochin nonpachina', inahuara Yosë yonquiatona', chiníquën cancantapi. Nipirinhüë', Yosë nanamën sha'huitohuachinënpoa', ya'ipi imarëhuasopita natanpatëhua', chini chiníquën cancantarihua'.

⁵Nisha nananquë pochin nonacaso' noya nipirinhüë', Yosë nanamën sha'huicaso' noya noya, tënhuë. Ina na'con na'con Yosë nohuantërin. Nisha nananquë nonpachina, ina piquëran ma'sona tapon naporinso' sha'huichinënquëma'. Imaramasopita natanatoma', noya yonquicamaso marë' sha'huichinënquëma'. ⁶Yosë a'chintohuachincora, inachachin iyaro'sa'

sha'huitëranquëma'. Ina anitotohua-chincora, nanamën chachin a'chintëranquëma'. Inapotato, catahuanquëma' noya noya imacamaso marë'. Nisha nananquë nonpiso pochin nontëranquëma' naporini, co nataintomacohuë'. Co ina quëran noya noya imaitomahuë'. Canpita nananquë chachin no'tën nanan pënënpatënuëma', tëhuëenchachin catahuanquëma'.

⁷Ni'co'. Quina co noya pihuihuachinahuë', napoonin natanpi. Quitaranta' co noya pi'nihuachinahuë', napoonin natanpi. ⁸Tronpitanta' nisha nisha pihuiipi sontaro'sa' nitotacaiso marë'. A'na tahuëri inimicoro'sa' huë'pachinara, tronpita pihuiipi sontaro'sa' përacaiso marë'. Co no'tëquën pihuihuachinahuë', co sontaro'sa' niyontopanpihuë' inimicoro'sa' ahuëcaiso marë'. ⁹Inapochachin canpitanta' nisha nananquë nonpiso pochin nonpatama', co natanarinënuëmahuë'. Topinan quëran nonsarama'. ¹⁰Tëhuëenchachin iyaro'sa' nisha nisha nanan ya'huërin. Nisha nisha piyapi'sa' ninontacaiso marë' ya'huëpirinhuë', ¹¹co nitotohua-tëhuahuë', co natanarihuahuë'. “Nisha piyapi ni'ton, nisha nananquë nonin,” tënëhua'. Co ninontacaso' nanitarihuahuë'. ¹²Na'con nohuantërama' Ispirito Santo catahuainquëmaso'. Nisha nisha nicacamaso' nohuantërama' ni'quëhuarë' ma'sona tëranta' nipatama', a'napita imapisopita catahuaco' noya noya cancantacaiso marë'.

¹³Napoaton nisha nananquë nonpiso pochin yanonpatama', Yosë nontoco' ma'sona tapon nonamaso' nitotamaquë. Ina quëran nitotatoma', canpita nananquë chachin piyapi'sa' sha'huitoco'. ¹⁴Nisha nananquë Yosë nontohuato, ispiritonëhuë' quëran nontopirahuë', ma'sona tapo naporahuëso' co

nitotërahuë'. ¹⁵Napoahuarë', ¿onpocasota ya'huërin? Ispiritonëhuë' quëran Yosë nontarahuë', cantarahuë', napoarahuë'. Napoaporahuë', ma'sona tapo naporahuëso'ta' yonquiato, Yosë nontarahuë', cantarahuë' napoarahuë', tënhuë'. ¹⁶Niyontonpatama', a'naquëma' Yosë chinotatoma', “Yosparinquën,” itohuachina, napopináchin yonquiato, “Amen,” tënama'. Napoaponahuë', nisha nananquë nonpiso pochin nontëramanaporini, a'napitaso' co nitotatonahuë', co “Amen” ta'caiso' nanichitonahuë'. ¹⁷Noya Yosë nontopiramahuë', a'napitaso' topinan quëran natanpi ni'ton, co catahuaramahuë'. ¹⁸Canta' nisha nananquë nonpiso pochin nitononahuë'. Canpita quëran na'con na'con nitotërahuë'. Ina marë' “Yosparinquën” itërahuë' Yosë. ¹⁹Napoaponahuë', Yosë chinotacaso marë' niyontonpatëhua', a'chinacaso' noya noya tënhuë'. Nisha nananquë pochin nonato, shonca huaranca nanan nonahuë' naporini, topinan quëran nointohuë'. Canpoa' nananquë cara nanafinchin tëranta' nonpato, natanama' ni'ton, noya noya ninin, tënhuë'.

²⁰Canpitaso' iyaro'sa' chinotono'sa pochin yonquico'. Ama hua'huaro'sa pochin yonquicosohuë'. Napoaponahuë', hua'huaro'sa pochin noyápiachin cancantatoma', noyasáchin nico'. Inapitaso' co yonquiyatërapihuë' oshahuanacaiso'. ²¹Yosë quiricanënuë' iráca ninshitërin: “Cotioro'sa' hua'qui' pënënpirahuë', co yanatërinacohuë'. Napoaton nisha piyapi'sa' inaquë a'parahuë'. Nisha nananquë nontapirinahuënta', co natëarinacohuë',” tënin Yosë. ²²A'naquën nisha nananquë nonpiso pochin nonpi. Co imapisopitasohuë' ayonquicaiso marë' napopi. “Yosë nohuanton, naporin,” ta'tona',

yonquiapona' nimara. Imarëhuasopitaso nipirinhue', canpoara nanamënpoaquë chachin Yosë nanamën sha'huito-huachinënpoa', noya cancantarihua': "Ma noyacha catahuarinpoa paya," tarihua'. ²³Yosë chinotacaso marë' niyontonëhuaquë, a'naquën co Yosë imana'piro'sahuënta' ya'conpi. Nisha nananquërachin nonpatama', co natanatonaraihuë': "Hua'yantomarai'," tapona'. ²⁴Nipirinhue', Yosë nanamën a'chintohuatama', co imarinsopitahuënta' noya natanapi. Pënëntërinso' natanahuatona', yonquiapi: "Tëhuënchachin canta' co noyahuë' nicato, oshahuanahuë'," tosapi. ²⁵Cancanëna quëran yonquipisopita a'ninquëchín sha'huitapi ni'ton, ina yonquiatona', oshanëna marë' sëtapi. Isonahuatona', Yosë chinotapi: "Tëhuënchachin Yosë catahuarinquëma'," itarinëinquëma'.

Niyontonpachinara Yosë chinotopiso'

²⁶Napoaton iyaro'sa' niyontonpatama', noyasáchin yonquico'. A'naquëma' cantarama'. A'naquëma' Yosë nanamën a'chinararama'. A'naquëma' Yosë anitotërinquëmaso' sha'huitarama'. A'naquëmanta' nisha nananquë nonpiso pochín nonsarama'. Ina piquëran a'naquëmaso' ma'sona tapon nonamaso' canpita nananquë sha'huitarama'. Ma'sona tëranta' nipatama', nicatahuaco' ya'ipinquëma' noya noya imacamaso marë'. ²⁷Nisha nananquë pochín yanonpachina', a'naya a'naya noina'. Catoya'pihuë nipon, caraya'pihuë nipon, inaíchin noina'. Naporahuaton, a'nanta' ma'sona tapon noninso' sha'huiin. ²⁸Co insoari tëranta' sha'huitacaso' nanitohuachinhue', niyontonpiquë ama ina pochín noinasohue'. Ina pochín yanonpachín, inaora paaton, noin

Yosëíchin natanacaso marë'. ²⁹Niyontonpatama', catoya, caraya nimara Yosëri anitotërinso' sha'huiina'. A'napi-taso' nataina'. No'tën nanan nipachín, noya natanatoma' yonquico' no'tëquën natëcamaso marë'. Yosë nanamënáchin imacaso' ya'huërin. ³⁰A'nanta' inaquë huënsërinso' Yosëri nanan anitotohuachín, inanta' sha'huiin. Yasha'huihuachín, ya'nan nona'pi ta'taton, nata'in. ³¹Inapoatoma', a'naya a'nayanquëma' pënëntoco'. Ya'ipinquëma' noya noya yonquicamaso marë' nipënenco'. Napohuatama', canpita capini niachinicanararama'. ³²Nipënënpatëhua', a'naya a'nayanpoa' pënëntacaso' ya'huërin. A'na'ton tonihuachín, a'nanta' pënëntanta'in. Ina toniantahuachín, a'nanta' pënëntanta'in. ³³Yosëso' co nisha nisha ayonquirinpoahuë'. Catahuarinpoa' sano cancantacaso'. Niyontonëhuaquënta' catahuarinpoa' a'naya a'nayanpoa' pënëntatëhua' noya Yosë chinotacaso marë'.

Ya'ipi Yosë imarëhuasopita nisha nisha niyontonëhuaquë, ³⁴sanapi'saso' ta'tatona', nataina'. Ama pënëchinasohue'. "Quëmapi'sa' natëina'," ténin Yosë pënëntërinquë. ³⁵Ma'sona yanitotohuachina', pëinënaquë so'ina' nataina'. Yosë chinotacaso marë' niyontonpatama', sanapi'saso' co nonacaiso' ya'huërinhuë'.

³⁶Isonta' yonquico'. Co canpita'ton Yosë nanamën nitotëramahuë'. Naporahuaton, co canpitaráchin a'chintërainquëmahuë'. ³⁷Yosë nanamën chachín no'tëquën a'chintëranquëma'. No'tëquën ninshitëranquëma'. Insosona yapënëntohuachín, natëinco. Ispirito Santo tëhuënchachín catahuahuachinquëma', ina nanan chachín natëarama'. ³⁸Nisha a'chintohuachinëinquëma', ama natëtocosohue', tënahue'.

³⁹Napoaton iyaro'sa', Yosë anitotë-rinquëmaso' sha'huicamaso' na'con na'con nohuantoco'. A'naquën nisha nananquë nonpiso pochin yanonpachina, tananpitoco' noin. ⁴⁰Nipirinhüë', ama noncarocosohüë'. A'naya a'nayanquëma' nonco'. Noyápiachin cancantatoma', Yosë yonquico'.

Quisocristo nanopiantarinso'

15 ¹Yosë nanamën iyaro'sa', nani a'chintëranquëma'. “No'të-quën nontërincoi,” ta'toma' natërama'. Natëtoma', imamiatarama'. Ina nanan chachin sha'huitaantaranquëma' yonquicamaso marë'. ²Ina natëmia-tohuatama', Yosë nicha'ësarinquëma'. A'naquënso nipirinhüë': “Imarahüë,” taponaraihuë', topinan quëran napopi. Co cancanëna quëran natëpihuë'. Inapitasto' co nicha'ësarinhuë'.

³Ya'nana a'chintaponquëma', Yosë anitotërinco chachin sha'huitëranquëma': “Oshanënpoa' inquitinpoaso marë' Quisocristo chiminin,” itëranquëma'. Iráca Yosë quiricanën quëran ninorinso chachin chiminin. ⁴“Chiminpachina, pa'pitopi huachi. Pa'pitopirinhüë', cara tahuëri quëran nanopiantarin,” itëranquëma'. Quiricanënuquë ninorinso chachin nanopiantarin: ⁵Nanpiantarahuatón, Pitro ya'notërin. Ca'tano'sanënpitanta' ya'notërin. ⁶Ina quëran na'a imapisopita niyontonasoi', ya'notaantarin. A'natërápo pasa na'con ni'pi. Ipora huanta' nanpirapi. Cara'chín nani chiminpi. ⁷Santiaconta' ya'notërin. Naporahuatón, ya'ipi a'chinacaso marë' acorinsopita ya'notaantarin. Ina quëran inápaquë panantarin.

⁸Piquëran huarë' canta' ni'nahuë. Ana'huaya pochin nipirahuë', inápa quëran ya'notimarinco. Naporo huarë' imarahüë. ⁹Imapisopita aparisitërahüë

ni'ton, co acoincoso' ya'huërinhuë', topirahuë'. Pa'pi co noyahuë' cancantopirahuë', anoyacancantatonco, acorinco paato a'china'huaso marë'. ¹⁰Inaora nohuantón, Yosë catahuarinco. Co catahuarincohuë' naporini, co manta' nanichitohüë'. Catahuahuachincora, pa'nahuë nanamën a'chinapo. Co topinan quëran catahuarincohuë'. Caso' na'con na'con Yosë marë' sacatërahüë. Co cariso' piyapi'sa' anoyacancantërahüë'. Yosë achinicancaninco a'china'huaso marë'. Ina catahuarinco ni'ton, a'chinpatera na'a piyapi'sa' imasapi. ¹¹Yosë nanamën a'chintëranquëma'. Quisocristo ca'tano'sanënpitanta' a'chinpi. Ina nanansáchin a'chintërainquëma', natërama'.

Quisocristo imarëhuasopita nanopiantacaso' ya'huërinso'

¹²“Quisocristo nanopiantarin huachi,” itërainquëma' ni'ton, ¿onpoatomata' a'naquëmaso' co no'tëquën yonquiramahuë'? “Co Yosë ananpitaantarinpoahuë’,” toconama'. ¹³Co nanopiantacaso' ya'huërinhuë' naporini, co Quisocristo tëranta' nanopiantaitonhuë'. ¹⁴Co nanopiantarinhuë' naporini, topinan quëran a'chinchitënuquëmahüë'. Canpitanta' topinan quëran natëitomahuë'. ¹⁵Co nanopiantarinhuë' naporini, nani nonpinchitënuquëmahüë'. Nipirinhüë', co iyaro'sa' nonpin nanan a'chintërainquëmahüë'. “Yosëri chachin ananpitaantarin,” itohuatëin-quëmara, no'tëquën nontërainquëma'. ¹⁶Co ananpitaantainpoaso' ya'huërinhuë' naporini, co Quisocristo tëranta' nanopiantaitonhuë'. ¹⁷Co nanopiantarinhuë' naporini, topinan quëran imaitërihuahuë', co oshanënpoa' inquichitonpoahuë'. ¹⁸Co nanopiantarinhuë' naporini, a'naquën imapisopita nani chiminpi ni'ton, parisitopiquë

pa'itonahué'. ¹⁹Isoro'pa maréáchin Quisocristo imaréhua' naporini, pa'pi nosorochitèrihuahué'.

²⁰Nipirinhué', Quisocristo tēhuēnchachin nani nānpiantarin. Ya'nān cayarinsō' sēnarēsō pochin ina'ton nānpiantaton, nānpimiatarin. Ina quēran canpoanta' chiminarihuarahué', nānpiantarihua'.

²¹Atan'ton co Yosē natētonhué', chiminin ni'ton, canpoanta' chiminēhua'. Inapochachin Quisocristosō' chiminapōnahué', nānpiantarin ni'ton, canpoanta' nānpiantarihua'. ²²Atan pochin cancantatēhua', ya'ipinpoa' chiminēhua'.

Napōaponahué', Quisocristo imapatēhua', ya'ipinpoa' anānpitaantarinpoa'.

²³Co napopináchin nānpiantarihuahué'.

Quisocristo'ton nānpiantarin. A'na tahuēri o'mantahuachin, imarēhuasopitanta' anānpitaantarinpoa'. ²⁴Ina quēran ya'ipiya naniarin. Iporasō' nisha nisha hua'ano'sa', copirnorō'sa', inapita chiníquēn nanantatona', camairinēnpoa'. Sopairo'santa' yacamairinēnpoa'.

Quisocristo o'mantahuachin, ya'ipiya minsēarin. Nani minsēhuachin, Tata Yoséíchin ya'ipiya hua'anēntarinpoa'.

²⁵Ina nohuanton, Quisocristo chiníquēn nanantarin. Ya'ipi hua'anēntarin. A'na tahuēri ya'ipi inimicorō'sa' minsēarin.

²⁶Ina quēran huachi chimirionta' ayatarin. Anānpitaantahuachinpoa', chimirin minsēarin huachi. Co huachi chiminacaso' ya'huaponhué'.

²⁷“Yosē nohuanton, ya'ipiya minsēarin huachi,” tēnin Yosē quíricanēnquē. Napoaton Quisocristo ya'ipiya hua'anēntarin. Tata Yoséíchin co hua'anēntarinhué'. Inari Quisocristo chiníquēn nanan quētērin.

²⁸Ina nohuanton, Quisocristo ya'ipiya minsēarin. Nani minsēhuachina, inanta' Yosē hui'nin ni'ton, pa'pin natēmiatarin. Naporo quēran huaré' Yoséáchin ya'ipiya hua'anēntomiatarin.

²⁹¿Onpoatomata' ipora huanta' a'naquēma' co natēyátēramahué'? “Co Yosē anānpitaantarinpoahué',” toconama'. Co no'tēquēn yonquiramahué'.

A'naquēn chiminpisopita yonquiatona', inapita ya'huērēnamēn aporihuanpi. Co nānpiantacaso' ya'huērinhué' naporini, ¿ma'marēta' inapitanta' napo'itonahué'?

³⁰¿Ma'marēta' quiyanta' parisitaporaihué', a'chinárai? Nani tahuēri yaahuērīnaco.

Co nānpiantahuatēhuahué', topinan quēran parisitērai.

³¹A'naquēn yatēparinaco. Nani tahuēri “Chiminapo nimara,” tēnahué. Tēhuēnchachin no'tēquēn nontēranquēma'.

Quisocristo catahuarinco ni'ton, a'chintohuatēnquēmara, noya imarama'. Ina maré' nóya cancantērahué.

³²Ipoquē a'chinahuēsō maré' chiníquēn no'huirīnaco. Ni'ni pochin cancantatona', yatēparinaco.

Ahuantaporahué', ¿ma'ta' ina maré' canarahué? Isoro'paquēráchin ya'huērēhua' naporini, co manta' canaitērihuahué'.

Co nānpiantacaso' ya'huērinhué' naporini, co Yosē yonquicaso' ya'hué'itonhué'.

“¡Huēco' coshatahua'. Huēco' o'oahua'. Co hua'quiya quēranhué' chiminarihua' ni'ton, capa cancantahua'!” topiso pochin nichitērihuahué'.

³³Ama ina pochin yonquicosohué'.

Ni'cona a'napita anishacancantochinēnquēma'. “Co noyahué' nipsisopitaré'quēma' nipayahuatama', canpitanta' nitapicananarama'.

Inapita nonānpatama', co huachi noyápiachin cancantaramahué',” topi iráca. No'tēquēn napopi.

³⁴No'tēquēn yonquiatoma', noyasáchin nico'. Ama huachi tēhuēcosohué'. A'naquēma' co Yosē nohuichátēramahué'. Ina yonquiatoma', tapanacamaso' ya'huērīn, tēnahué.

Nasha nonēnpoa' quētarinpoaso'

³⁵A'naquēma' yanitotērama'. “Chiminpatēhua', ¿onporahuatēhuata'

nanpiantarihua'? ¿Onpopinta' nonënpoa' ya'huëtañonpoaso'?" tënama'.³⁶ ¡Co canpitaso' nitoyonquiramahuë'! Ni'cochi. Ya'pirin sha'patëra, ya'pirin chachinso' chimininsó pochin ninin. Acopo' ya'pira'huainso nipirinhuë', noya papotërin.³⁷ Tricoraya yonquia'ahua'. Ina sha'patamara, aipi noshinënso' co papotërinhuë'. Ya'pira'huain papotohuachina, nisha ya'norin huachi.³⁸ Yosë nohuanton, ma'sha papotërin. Nisha nisha ya'pirin sha'patëra, nisha nisha papotërin. Co napopináchin papotërinhuë'. Yosë nohuanton, naporin.³⁹ Ma'sharo'santa' nisha nisha noshatopi. Piyapinpoanta' nonënpoa' nisha. Ohuacaro'sa', inairaro'sa', samiro'sa', inapitanta' nisha nisha noshatopi. Co napopináchin noshatërehuahuë'. Nisha nisha acorinpoa'.⁴⁰ Nisha nisha ma'sha isoro'paquë ya'huërin. Inápaquë ya'huëpisopitanta' nisha nisha ya'nopi. Co napopináchin noyápiachin ya'no-pihuë'.⁴¹ Pi'iso' huënaráchin huënaráchin a'pinin. Yoquinta' nisha a'pinin. Tayoraro'santa' nisha nisha a'pinpi. Co napopináchin a'pinpihuë'.

⁴²Inapochachin canpoanta' nanpian-tahuatëhua', nisha ya'noaríhua'. Chiminpatëhuara, nonënpoa' chanatopirinhuë', nanpian-tahuatëhua', nasha nonënpoa' ya'huëtarinpoa'. Co onporonta' chanatarinhuë'.⁴³ Iporaso' nonënpoa' co onpopinchin noyahuë'. Chiminpatëhua', pa'pitarinënpoa'. A'na tahuëriso' nipirinhuë', noyápiachin nonënpoa' ya'huëtarinpoa'. Iporaso' co chinipirëhuahuë'. Nanpian-tahuatëhua', chiniaríhua'.⁴⁴ Isoro'pa marëáchin nonënpoa' ya'huëtërinpoa' ni'ton, chiminëhua'. Pa'pitopirinënpoahuë', ananpitaantahuachinpoa', nisha nonënpoa' quëtarinpoa' Yosë'pa' ya'huëcaso marë'. Iporaso' nonënpoa'

Yosë acotërinpoa' isoro'paquë ya'huëcaso marë'. A'na tahuëriso nipirinhuë' noya noya nonënpoa' quëtarinpoa' inápaquë ya'huëcontacaso marë'.

⁴⁵Yosë quiricanënquë tapon: "Íraca Yosëri ya'nan quëmapi nininso' Atan itërin. Inaso' nonën quëtërin isoro'paquë nanpicaso marë'," tënin. Iporaso' Quisocristonta' Atan pochin nicaponahuë', Yosë chachin ni'ton, catahuarinpoa' canpoanta' Yosë pochin nanpicaso marë'.⁴⁶ Napoaponahuë', ya'nan nipon, nonënpoa' quëtërinpoa' isoro'paquë nanpicaso marë'. Ina piquëran nasha nonënpoanta' quëtarinpoa' inápaquë nanpimiatacaso marë'.⁴⁷ Atanso' no'pa quëran ninin isoro'paquë nanpicaso marë'. Quisocristoso nipirinhuë' Yosë ya'huërin quëran o'marin ni'ton, noya noya ninin.⁴⁸ Ya'ipi piyapinpoa' Atan pochin nicatëhua', ina nonën pochin ya'huëtërinpoa'. Napoaponahuë', Quisocristo imapatëhua', a'na tahuëri ina nonën pochachin ya'huëtarinpoa'.⁴⁹ Iporaso' Atan pochin ya'norëhua'. A'na tahuëriso nipirinhuë' Quisocristo pochin ya'noaríhua'.

⁵⁰Nonënpoa' ipora ya'huëtërinpoaso' co nanitërinhuë' Yosë hua'anëntërinquë paacaso'. Chiminpatëhua', nonënpoa' chanatarin, co ya'huëmiatarinhuë'.

⁵¹Noya natanco iyaro'sa'. Na'a piyapi'sa' co nitotopirinahuë', sha'huítaranquëma'. Co ya'ipi imarëhuasopita chiminaríhuahuë'. Napoaponahuë', Yosë nohuanton, ya'ipi imarëhuasopita nisha ya'noaríhua'.⁵² A'nanaya nisha nonënpoa' ya'huëtarinpoa'. O'mantacaso' tahuëri nanihuachin, tronpita pihuirarin. Pihuihuachin, chimin-pisopita nanpiantarapi. Quisocristo imapi ni'ton, ananpitaantarin huachi. Naporo' ya'ipi imarëhuasopita nisha nonënpoa' ya'huëtarinpoa'. Co huachi

chiminarihuahué!.⁵³ Nonënpoa' ipora ya'huëtërinpoaso' chanatarin. A'na tahuëriso nipirihué' nisha nonënpoa' ya'huëtohuachinpoa', co chanatarinhué'. Nasha a'morëso pochin nisarihua'. Co huachi chiminarihuahué'.⁵⁴ Nisha nonënpoa' quëtohuachinpoa', nãpiantarihua'. Yosë quiricanën quëran ninoton, naporin: "A'na tahuëri Yosëri chimirin minsëarin. Co huachi chiminacaso' ya'huaponhué'.⁵⁵ ¿Onporahuatonta' chimirin minsëarinpoa'? Co huachi nanitarinhué'. Ya'huan quëtëhuachinpora chiminëso pochin chiminacaso' ya'huëpirinhué', co huachi chiminacaso' të'huatarihuahué'," tënin.⁵⁶ Yosë iráca pënëntërinso' co natëtätëhuahué', oshahuanëhua'. Oshahuanëhua' ni'ton, chiminacaso' ya'huërin.⁵⁷ Ya'huëpirinhué', ¡ma noyacha Tata Yosëso' ni'ton, nicha'ërinpoa' paya! Ina nohuanton, Quisocristo ya'huëretërinpoa'. Corosëquë chiminatón, sopai minsërin. Nãpian-tarahuatón, chimirionta' minsërin. Ina maré': "Yosparinquën," itahua'.

⁵⁸ Napoaton iyaro'sa' chiníquën cancantoco'. Nosororãquëma' ni'ton, pënënarãquëma': Ama nisha nisha yonquicosohué'. Naporahuatón, paatoma' a'napita a'chintëra'piaco'. Sinioro catahuahuachinquëma', co onporonta' topinan quëran a'chinaramahué'. A'chinpatama', Yosëri nohuantërinso'pita imasapi huachi.

Pahuantërinso'pita catahuacaso' ya'huërinso'

16 ¹A'nanta' sha'huichinquëma', yonquico'. A'naquën imapisopita ma'sha pahuantarin ni'ton, parisitapi. Inapita catahuacaso maré' coriqui yaa'parama'. Carasiaquë imapisopitanta' coriqui a'parapi. Inapita nani sha'huitërahuë coriqui yontónacaiso

maré'. Inapochachin canpitanta' sha'huitaranquëma'.² Nani Tomio tahuëri niyontónpatama', coriqui acoco'. Nani-tëramaso' acoco'. Na'con canahuatama', na'con quëtoco'. Pi'pian canahuatama', pi'pian quëtoco'. Nani simana inapohuatama', nicaponquëma' pa'pato, coriqui yontónamaso' quënanconarahué.³ A'naquëma' noya ni'namasopita huayonco' coriqui quëpacaiso maré'. Canconpato, quiricatarahuë huayonamasopita nohuitacaiso maré'. Nani quiricatahuato, inarë chachin huayonamasopita a'paarahué. Quirosarinquë quëparapi pahuantërinso'pita quëtacaiso maré'.⁴ Nanitohuato, canta' pa'samaraco. Pa'patoso', napopináchin pa'sarai.

Nicapon yapa'ninso'

⁵Nicaponquëma' yapa'pirahué', iporaso' co nanitërahué'. Masitonia parti paca'huaso' ya'huërin. Nani ni'tontahuato, ya'huëramaquë pa'sarahué.⁶ Canpitaquë hua'quimiáchin yacapanquëma'. O'napi tahuëri inaquë na'huëanatapo nimara. Ina quëran catahuaramaco a'na parti paca'huaso', topirahué'.⁷ Co topinan niraponquëmahué'. A'na tahuëri Yosë nohuantohuachin, hua'qui' yacapanquëma'.⁸ Iporaso nipirihué' Ipositoquë ya'huato, a'chinárahué. Panticostisë tahuëri huaré' isëquë ya'huapo.⁹ Yosë nohuanton, na'a piyapi'sa' isëquë yaimapi ni'ton, a'chintárahué. A'naquënso' no'huipirinaohué', pënëntárahué. Na'amiachin imasapi.

¹⁰Iya Timotio cantonpachinquëma', noya nontoco' noya cancanchin. Ca pochachin inanta' Yosë nanamën a'chinarin.¹¹ Hui'napi nipirihué', ama nocancosohué', noya natanco'. Noya nontatoma', catahuaco' isëquë

huënanta'in. Ina ninarahuë. A'napita iyaro'sarë' canquimapon, ténahuë.

¹²Iya Aporosënta' sha'huitopirahuë'. "Iyaro'sa' pa'pachina', quémanta' paquë'," itopirahuë', co ipora nohuantërinhuë'. Nanitohuachin, nicaponquëma' pa'sarin.

Tiquiapon pochin pënëninso'

¹³Ama huë'ërëso pochin cancantatamarahuë', noya yonquico'. Ya'ipi cancanëma quëran natëmiatoco'. Ma'sha onpoapomarahuënta', chiníquën cancantoco'. Niachinicancanco'. ¹⁴Ma'sona tëranta' nipatama', noya ninosoroatoma', nico'.

¹⁵Istipano sa'inë chachin nohuitërama'. Iráca Acaya parti a'chinpatëra, inapita'ton Quisocriso imapi. Pëinënuquë ya'huëpisopitanta' imasapi. Imatona', na'con catahuarinënuquëma'. Ya'ipi imapisopita catahuapi. ¹⁶Inapitaso' noya natëco', ténahuë. A'napitanta' chiníquën catahuarinquëma' noya imacamaso marë'. Insosona ina pochin a'chintohuachinquëma', noya ni'co'.

¹⁷Istipanasë, Portonato, Acaico, inapita isëquë cantihuachinacora, nóya cancantërahuë. Canpitaso' aquë ya'huatoma', co ni'namacohuë'. Inapitaso' ya'huërama

quëran huëcatona', catahuarinaco. ¹⁸Noya nontatonaco, achinicancaninaco. Canpitanta' achinicancaninënuquëma', ténahuë. Cancoantahuachina', noya nicatoma', natanco'.

¹⁹Ya'ipi imapisopita Asia parti ya'huë-piso' yonquiatënuquëma', saludos a'patarinënuquëma'. Aquira sa'inë chachin na'con yonquiatënuquëma', saludos a'patarinquëma'. Pëinënuquë niyontonpisopitanta' yonquirinënuquëma'. Canpitanta' Siniro imarama' ni'ton, na'con yonquirinënuquëma'. ²⁰Ya'ipicoi saludos a'patarainquëma'. Noya iyaro'sa' ya'huëco', tënai. Noya ninosoroatoma', nisë'quëco'.

²¹Ca Paonoco na'con yonquiranquëma'. Caora imirahuë quëran isoíchin ninshitaranquëma'.

²²Insosona co Siniro Quisocriso nosorohuachinhuë', Yosëri ana'inchin. ¡A'naroáchin Siniro o'mantaquë'! ténahuë.

²³Inaora nohuanton, Siniro Quisoso catahuainquëma'. ²⁴Ya'ipinquëma' Quisocriso imarama' ni'ton, nosorranquëma'. Nani ninshitëranquëma huachi.

Paono